

四庫全書

史部

欽定四庫全書

史部

大金集禮卷

五至七

詳校官監察御史_臣劉芬

編修_臣程嘉謨覆勘

覆校官中書_臣汪學金

校對官中書_臣王鍾泰

謄錄監生_臣閻豐

欽定四庫全書

大金集禮卷五

皇太后皇后

天會十三年尊奉兩宮太皇太后

天德二年尊奉永壽永寧宮

皇統元年冊皇后
天德二年冊徒單氏

雜錄

天會十三年尊奉兩宮太皇太后

天會十三年九月八日勅内外文武百僚等朕席祖宗二聖之休德託于士民君王之上涉道日淺罔知攸濟方賴母儀自家之化成孚王道而兩宮之號未極其崇朕用惕然夫推親親以顯尊尊古之制也雖曰殫四海之養而名稱未正如尊尊何宜率舊章用資孝治太祖皇帝皇后紇石烈氏太宗皇帝皇后唐括氏皆位冠六宮屬尊一體在均厥禮奉正鴻名並尊曰太皇太后第當別之以宮如長信故事俟諒

陰期畢有司擇日奉冊具禮施行布告中外咸使聞知

天德二年尊奉永壽永寧宮

天德二年正月詔有司擇日奉冊唐殷國妃岐國太妃仍別建宮名合行典禮禮官檢詳條具以聞差禮部外郎王競等三員監看成造冊寶印并法物禮部郎中胡礪等三員監看成造匣盂床殿牌額等命直學士劉長言撰冊文禮部外郎王競書篆冊寶命太師勗太尉

滿達充奉冊太尉太保宗本右丞 古辨充奉寶司徒
外讀冊中書令引冊中書侍郎讀寶侍中引寶門下侍
郎各二員舉冊舉寶官各四員以三品已上攝充并差
撰冊匣官各十八員撰寶蓋官各十二員主當內侍二
員及宣徽使通事舍人太常博士等正月二十五日行
禮十七日擬稟合行儀禮准外禕衣大樂不用冊寶法
物二副 闕 階玉冊每副五十條一十條標充首四片上面
畫捧冊神農四十條充寫冊文鐫字貼金寶檢斗座並

用金寶用盤螭紐紐下釵水地四面釵雲鳳伴寶玉鐙
用朱組大綾綬一條半幅長八尺梅紅綾明金盤雲鳳
冊寶匣蓋床行馬等並用朱漆釵鳳帕褥法物等並依
已行制度皇太后於典禮合服褱衣若服褱衣皇帝合
服通天冠絳紗袍樂用大樂百官衣服亦合依古切恐
難迭擬止服拜天之服皇帝服靴袍樂用教坊百官公
裳其日質明有司各具繖扇侍衛如儀及兵部約量差
軍兵并文武百官詣兩宮迎請引導

前導官散
從人衫帽

皇太后

入內並赴受冊殿入御幄侍衛如式次奉冊太尉等俱以冊置於案引冊官押舉冊官並先入立於殿西階下奉寶司徒等俱以寶置於案引寶官押舉寶官並先入立於殿西階下皆盛以匣覆以帕詣別殿門外幄次教坊提點率教坊入侍衛官各就列皇帝常服乘輿至別殿後幄次通事舍人引宣徽使版奏中嚴復位少頃又奏外辦幄簾卷教坊樂作扇合兩宮皇太后出自後幄並即御座南向扇開樂止

分左右少退

通事舍人引文武百寮

班左入依品重行西向立定通事舍人喝起居班依常
朝例起居七拜訖引文武百寮班分東西相向立通事
舍人太常博士贊引太常卿前導押冊官押冊而行奉
冊太尉讀冊中書令舉冊官等以次從之凡太尉司徒
行並通事舍人太常博士贊引次押寶官押寶而行奉
寶司徒讀寶侍中舉寶官等以次從之俱自正門入教
坊樂作至殿庭西階下少東北向於褥位少置樂止冊
北寶南

其冊函蓋先去置於冊床上

通事舍人太常博士贊引太常卿前導押冊官押冊升

樂作奉冊太尉等從之進至兩宮皇太后座前褥位訖

樂止

兩宮冊寶齊上齊讀

舉冊官夾侍奉冊太尉各搢笏北向跪

俛伏興退立讀冊中書令俱進向冊前跪奏稱攝中書

令具官臣某言讀冊舉冊官單跪對舉押冊官並先退

復西階下東向立中書令各搢笏讀訖執笏俛伏興搢

笏捧冊興於位東迴冊函北向並進跪置於御座前褥

位訖中書令舉冊官俱降還位奉冊太尉並降階東向以俟押寶官押寶升樂作

其寶函蓋先去置於階上寶床上

奉寶司徒等從之進至兩宮皇太后座前褥位訖樂止舉寶官夾侍奉寶司徒各搢笏北向跪俛伏興退立讀寶侍中俱進當寶前跪奏稱攝侍中具官臣某言讀寶舉寶官單跪對舉押寶官並先退復西階下東向立侍中各搢笏讀訖執笏俛伏興搢笏捧寶興於位東迴寶

函北向並進跪置於御座前褥位冊之南通事舍人太常博士贊引太尉司徒以次應行事官俱降自西階復本班叙立宣徽使一員詣皇帝御幄前俛伏跪奏具官臣某言請皇帝謁兩宮皇帝后前行稱賀之禮本部擬俟皇太后並升座即奏請皇帝於上稍南西向侍立至讀冊寶訖奏請行稱賀之禮殿上奏請不跪奏訖俛伏興凡奏請准此贊引皇帝再拜訖又奏請北向跪賀曰嗣皇帝臣某言云云俛伏興又再拜訖又奏請皇帝少立內

侍承旨退西向稱兩宮皇太后旨

云云

皇帝再拜宣徽

使前引皇帝歸幄常服乘輿還內侍衛如來儀應階下
文武百寮重行立定通事舍人喝拜在位皆再拜通事
舍人引太師詣西階升俛伏跪奏稱文武百寮具官臣
某等稽首言皇太后殿下顯對冊儀永安帝養仰祈福
壽與天同休賀訖俛伏興降自西階復位立定通事舍
人喝拜在位官皆再拜舞蹈三稱萬歲又再拜訖宣徽
使升自東階取旨退臨階西向稱兩宮皇太后旨通事

舍人喝拜在外官皆再拜訖宣曰公等忠敬盡心推崇協力膺茲令典感愧良深宣訖還位通事舍人喝謝宣諭拜在位官皆再拜舞蹈三稱萬歲又再拜訖通事舍人分引應北向官各分班東西立定宣徽使升自東階奏稱具官臣等言禮畢降還位扇合皇太后並興教坊樂作降座還殿後幄次扇開樂止通事舍人引宣徽使奏解嚴中書侍郎等各帥捧冊床官升殿跪捧冊並置於床次門下侍郎等各帥捧寶床官升殿跪捧寶並置

於床訖通事舍人引詣東上閤門投進所司文武百寮
以次出皇太后常服乘輿各還本宮引導如來儀文武
百寮詣東上閤門拜表賀皇帝訖退

部元呈有謁廟不見施行

禮畢

各赴本宮受內外命婦稱賀所司預於殿內設皇太后
御座司賓引內外命婦於殿庭北向依序立定尚儀奏
請皇太后常服即座司贊曰再拜命婦皆再拜訖司賓
引班首詣西階升跪賀稱妾某氏等言伏惟皇太后殿
下天資聖善昭受鴻名凡在照臨不勝忻忭言訖起降

階復位司贊曰再拜內外命婦皆再拜尚宮承旨降自西階於命婦之北東面稱皇太后旨司贊曰再拜在位者皆再拜訖宣答膺茲典禮感愧良深司贊曰再拜在位者皆再拜訖退赴別殿賀皇帝亦如賀皇太后之儀惟不致詞不宣答

司賓司贊尚儀尚宮等擬用知禮內侍人等充如無用閤門

皇統元年冊皇后

天眷元年十二月二十五日命貴妃費摩氏為皇后制
曰易基乾坤以大陰陽之統詩經夫婦乃先后妃之風
故三代之令王謹六宮之內職況承宗廟儷辰極以居
尊用正人倫揭母儀於無外事所繫者甚重道相須而
後成非朕敢私自天作配猗歟誰氏廼茂徽音若稽舊
章誕布寵命貴妃費摩氏慶鍾戚里教肄公宮夢月方
娠生而固異覩天之妹卜則允臧爰用聘於先朝乃來
嬪於初載禮肅舅姑之奉訓無師傳之違道著家人名

膺邦媛逮予宅洛率履在中承祀孔寅睦親克孝蹈貞
賢之警戒知臣下之勤勞纘女維行輔朕不逮居軒后
四星之列貴則益恭在周官六服之儀缺然未講宜蠲
吉旦正位長秋於戲為望甚尊有同乎天地流風自近
以至於家邦言雖戒於閭閻令莫捷於身正恩宜逮下
志務求賢非儉德不能懲奢泰之風去私謁可以贊正
直之道慎終如始永孚于休

皇統元年正月二十一日習發冊及功成殿儀二十二

日行冊禮攝行事官就用初十日上尊號員數并行禮
用内外命婦奏定三品以上次室封號二十八日皇后
謁祖廟冊文皇帝若曰夫地承天而效法所以合德無
疆月遡日而生明故能容光必照是以有國有家者必
選立嘉配以上承宗廟而降德于臣民古今一也我國
家累聖重光開基垂統用端命于上帝亦惟內德相繼
匹休姜任燕謀所貽敢忘紹述咨示爾費摩氏柔惠端
淑得於天成發慶鍾祥世有顯聞自越初載來嬪潛邸

筭珣糾組率履無違逮朕纂服章明婦順表率勤劭陰
教修明雖已崇建位號而典冊未舉朕意歉然今遣太
尉費摩和坦攝司徒昂持節授爾冊寶副禕重翟宏賁
用光備物充庭一遵古禮朕惟王業所基率由內治和
睦自中化馳如神爾克勤人用弗敢棄日爾克儉人用
弗敢崇侈爾克正人用弗敢迂乃心倚乃身勉思其終惟
慎乃濟天其申命于我家爾亦永膺多福豈不韙歟攝
行事官各與恩賜總領冊禮太師宗幹金一百五十兩

銀絹三百兩足段子五十冊使太尉和坦金一百兩銀絹二百兩足段子二十以次中書令司徒侍中至於贊者主節大樂令協律令各有差

天德二年冊圖克坦

天德二年九月二十一日詔冊惠妃圖克坦令有司擇日備禮施行

詔書下禮部至冊禮畢十月十一日遍下

差待制王競等三員監看鐫篆冊寶并法物兵部郎中

劉仲延等三員監看成造匣蓋床等命侍讀劉長言撰冊文王競書冊篆寶命禮部尚書宗安十月七日告天地特進安塔哈告宗廟各差引贊行禮太常博士通事舍人并讀祝官一員

五禮精義云冊命大事先告天地宗廟示不敢自專社稷地祇之屬不必皆告

冊使太尉以正員充副使司徒以左相思忠攝侍中三一奏中嚴外辦一承制一奉寶讀寶進入內

中書令一

奉冊讀冊進入內

門下侍郎三

一引寶兼進入內二奉節

中書侍郎一

引冊兼進入內

宣徽使禮儀使吏部禮部侍郎各一舉冊中書舍人舉
寶給事中各二捧冊捧寶官各四並宰執以次攝充并

差引贊行禮九員

冊使副使讀冊讀寶引冊引寶兩奉節禮儀使

捍寶蓋官十二捍冊匣官十八大樂令協律郎主節二

閣門使典儀司贊一符寶郎八通事舍人十贊者二閣

門司內侍局十月九日勤政殿發冊泰和殿受冊并命

婦賀儀

九月二十七日稟過

前一日儀鑾司設座勤政殿南向設

羣臣次於朝堂大樂令展宮懸於殿庭設協律郎舉麾
位於樂懸西北東向閣門設百官班位於庭並如常朝

之儀又設典儀位於班位之東北贊者二人在南少退俱西向設冊使副位於殿門外之東又設冊使副受命位於百官班前又設冊寶幄次二於殿後東廂俱南向
前一日尚書工部奉冊寶進入

其日諸衛勒所部略列黃麾細仗於庭

用前六部攝官七十一員擎執六百七十八人

符寶郎奉八寶置於左右吏部侍郎奉冊禮部侍郎奉寶匣皆置於床訖出就門外班大樂令協律郎樂工典

儀贊者各入就位羣官等依時刻集朝堂俱就次各服朝服侍中約刻板奏請中嚴通事舍人引羣官入就於庭東西相向立以北為上又引冊使副立於東偏門西向門下侍郎引主節奉節立於殿下東廊橫階道北中書令中書侍郎帥舉捧官奉冊床立於節南侍中門下侍郎帥舉捧官奉寶床立於冊床之南俱西面侍中版奏外辦殿上索扇協律郎舉麾宮懸奏曲皇帝服通天冠絳紗袍出自東房曲直華蓋警蹕侍衛如常儀即座

南向坐簾捲樂止通事舍人引冊使副入宮懸奏曲使副就受命位侍中中書令門下侍郎中書侍郎舉捧官依舊西面立羣臣合班橫行北面如常朝之儀立定典儀曰再拜贊者承傳班首已下羣官在位者皆再拜班首問起居又再拜閣門官引攝侍中出班承制降詣使副東北西面稱有制使副稍前揖躬再拜攝侍中宣制曰命公等持節授后冊寶宣制訖又俱再拜侍中還班門下侍郎引主節詣冊使所主節以節授門下侍郎門

下侍郎執節面西授太尉太尉受付主節

主節立

於使副

之左右門下侍郎退還班位中書侍郎引冊床門下侍郎引寶床立於冊使東北面西以次授與太尉太尉皆捧受冊床置於北寶床置於南侍中中書令禮儀使舉捧冊寶官及揖床者退於東西塲道之左右相向立門下侍郎中書侍郎退還班位典儀曰再拜贊者承傳群官在位者皆再拜羣官拜訖分班歸東西相向位舉捧揖冊寶床者進冊床先行讀冊官次之寶床次行讀寶

官次之舉捧官各分左右通事舍人引冊使隨之以行
持節者前導太尉初行宮懸樂作出殿門樂止攝侍中
出班升殿奏侍中臣言禮畢殿上索扇簾降宮懸奏曲
降入自東房樂止通事舍人引羣官在位者以次出俟
太尉司徒復命禮畢還內先是有司預設太尉司徒本
品革車鹵簿於門外至殿門左右排列俟使副出鼓吹
振作

鹵簿依本品合得人數如無鹵簿鼓吹即代以錦衣

人從

禮儀使舉捧官執節者并擡擗人以冊寶少駐於泰和門太尉司徒及讀冊官暫歸幕次內侍閤門引入泰和殿俟至殿下位鼓吹止有司宿供張泰和殿設皇后座於庖前殿上垂簾又設東西房於座之左右稍北又設受冊位於殿庭西階之南東向又設內命婦次於殿之左右大樂令設宮懸於庭協律郎設舉麾位於殿上又設冊寶次於門外又設行事官於門左右又設外命婦

次於門之內其日諸衛於殿門外略設黃麾細仗

用後六部攝官三十六員擎執三百二十二人

有司設二步障於殿之西階簾前設扇左右各十紅繖
一在西階欄干外又設舉冊寶案位於使副之前北向
又設宣徽使位於北廂南向司贊設內外命婦以下陪
列位於殿庭塲道之左右每等重行異位北向內命婦
在後又設司贊位於東階東南贊者二人在南少退俱
西向質明執事官大樂令等各就位

內外命婦擬各服其本服

皇后常服乘龍飾肩輿

肩輿如無用小龍車子代

至泰和殿後閣近仗導衛如常儀宣徽使奏中嚴冊使
副入門宮架奏曲俟冊使庭中立樂止冊在北寶在南
使副立於床後禮儀使帥持節者立於前舉捧冊寶官
立於冊寶床左右讀冊寶官各立於其後宣徽使奏外
辦內侍閣門官引后出後閣宮懸奏曲簾捲

如首飾褱衣難迭成造即用皇后拜天服

皇后降自西階

皇后升降並內侍閣門引

左右步障繖扇從至階下望勤政殿御閣所在立樂止
冊使進立於右宣曰有制閣門使內侍贊再拜拜冊使
宣曰制遣太尉臣某司徒臣某恭授后冊寶閣門使內
侍贊再拜冊使少退中書令侍中及舉捧官率擡擗人
奉冊寶以次進於前宮懸奏曲冊寶床自東階升並置

於殿之前楹間冊床在北寶床在南中留讀冊寶官立位並去帕及蓋擡捍人執之退立於西廂殿舉擡官分左右相向立讀冊寶官各立於床之東西向立既定樂止閤門使內侍贊再拜捧謝表官以表授左立內侍內侍以授后受訖以付右立內侍內侍持表立於右閤門使贊再拜訖冊使退宮懸奏曲持表內侍以表付閤門官隨冊使行冊使副至門鼓吹振作如來儀入西偏門鼓吹止冊使副至御閣所在俛伏跪奏太尉臣姓名司

徒臣姓名奉制授冊寶禮畢俛伏興退持表閣門官進表近侍接入進讀訖退初冊使退及門樂止閣門內侍引后自西階升殿宮懸奏曲繖扇止於簾外退於左右朶殿前步障止於階下卷之后於座前南向立樂止中書令詣冊床南立北向稱中書令臣名謹讀冊讀畢降自東階立於欄外第一墀上西向次侍中詣寶床南立北向揖稱侍中臣名讀寶讀畢降階立於中書令之北西向內侍閣門引升床宮懸奏曲坐定樂止舉捧官以

次招擡擯人持帕蓋覆匝床奉置殿之左右冊床在東
寶床在西置訖舉捧官以次降階立於中書令侍中之
後立定合班面北閤門贊再拜拜訖降東階退出殿門
其擡擯人置冊寶床於東西訖各由朶殿下階於侍中
等班後直出殿門以俟復入擡擯入宮受冊表謝訖內
侍跪奏禮畢閤門引內外命婦陪列者以次進就北向
位班首初行宮懸奏曲至位樂止閤門曰再拜命婦皆
再拜閤門引班首自西階升樂作至階樂止進當座前

北向躬致稱賀訖降自西階樂作至位樂止閤門曰再拜舍人承傳命婦等皆再拜閤門使前承令降自西階詣命婦前西北東向稱有教旨命婦等皆拜閤門使宣曰云云祇奉聖恩授以冊寶榮幸之至兢厲增深所賀知舍人曰再拜命婦皆再拜訖內侍引內命婦還宮班首初行樂作出門樂止內侍引外命婦出次宣徽使奏稱禮畢降坐宮懸奏曲入東房樂止歸閤宮懸奏曲至閤樂止更常服內侍承教旨宣外命婦入會並如常儀

會畢閣門引外命婦降階橫行北向舍人曰再拜訖以次出還宮如來儀中書門下侍郎計會引進司帥擡擗人進冊寶入內交付與都點檢司退別日會羣官會妃主宗室等賜酒設食簪花教坊作樂如內宴之儀十一

日朝兩宮

先永壽宮
次永寧宮

并十三日恭謝太廟儀

三日

皇后

既受冊越二日內侍設座於所御殿南向其日夙興宣徽使版奏中嚴質明諸侍衛宮人俱詣寢殿奉迎宣徽使版奏外辦后首飾褱衣御車內侍前導降自西階以

出侍衛如常儀至太后之裏門外降車障扇侍衛如常
儀入立於西廂東向將至宣徽使版奏請中嚴既降車
宣徽使版奏外辦太后常服宣徽使引升座南向宣徽
使引后進升自西階北面再拜進跪致謝詞存撫賜酒
食並如家人之儀禮畢宣徽使贊再拜訖宣徽使引降
自西階以出出門宣徽使奏禮畢降座入宮前一日齋
戒於別殿內命婦應從入廟者俱齋戒一日其日未明
二刻有司陳設儀仗於后車之左右以次排列外命婦

先自太廟後門入內命婦妃嬪已下俱詣殿庭起居訖
宣徽使版奏中嚴少頃又奏外辦首飾褱衣御肩輿取
便路至車所內侍奏請降輿升車既升車奏請進發車
出元德東偏門內命婦妃嬪已下自殿門外上車由左
掖門出從至太廟門外儀仗止於門外回車南向內侍
奏請降車升輿后降車升輿就東神門外幄次下簾內
命婦妃嬪已下降車入就陪列位內侍引外命婦詣幄
次前起居訖並赴殿庭陪列位少頃宣徽使詣幄次贊

行朝謁之禮簾卷宣徽使前導詣殿庭階下西向褥位
立宣徽使贊再拜内外命婦皆再拜宣徽使前導升東
階詣始祖皇帝神位香案前褥位宣徽使奏請三上香
又奏再拜拜訖宣徽使前導次詣獻祖已下十室並如
上儀宣徽使奏禮畢導歸幄次宣徽使奏請解嚴内外
命婦幕次少頃轉仗還内如來儀外命婦退内侍奏請
御輿出至車所奏請升車既升車奏請進發内命婦上
車至元德東偏門内侍奏請降車升輿后御輿取便路

還內內命婦從入冊禮畢百官上表稱并以牋賀中宮

雜錄

天會十四年正旦帝謁太皇太后宮賀御乾元殿受百

官朝賀

十五年天
眷元年

天德二年十一月十五日有司檢照宋哲宗劉太后詣

景靈宮其禁衛圖內御龍直傳聖旨打傘執從物五十

三人唐永貞元年憲宗尊母王氏為太上皇后其冊儀

稱有令旨元和六年上皇太后尊號其儀稱有令呈稟

訖皇太后稱令旨二月五日設永壽永寧宮導駕各三

十人壽安宮

太皇太妃

導從二十人各設傘子二人九日稟

訖盤鳳紫衫幘帶依弩手傘子例又四月二十九日皇太后太皇太妃每年隨宮錢各二萬貫表二百段絹一千疋綿五千兩

貞元儀皇太后尊從駕六十人傘子不在數並服簇四盤鵬團花紅綿襖子金花幘頭金鍍銀束帶

大金集禮卷五

欽定四庫全書

大金集禮卷六

追諡后

聖穆光懿皇后

欽獻皇后

欽仁皇后

惠昭皇后

永寧宮

欽慈貞懿皇后

宣獻皇后

昭德皇后

悼平皇后

闕

聖穆光懿皇后

天會十三年二月十一日追冊聖穆光懿皇后并德妃
賢妃命昱攝太尉奉上冊寶宗翰攝中書令進冊韓企
先充二妃冊贈使扎拉爾古新攝侍中奉寶烏達布勝額攝
中書令奉冊高慶裔蔡靖攝門下侍郎讀寶韓昉張鈞
攝中書侍郎讀冊并舉寶給事中四舉冊中書舍人四
押冊中書侍郎二讀冊中書舍人二太常卿太常博士
一典儀二

欽獻皇后

天會十四年二月五日上欽獻皇后尊諡

威德悉備曰欽聰明睿知曰獻

命實古納充太尉上冊寶謀衍進冊宗弼奉寶阿里布
奉冊趙翰讀寶韓昉讀冊并舉寶舉冊官各二太常卿
太常博士一典儀二

欽仁皇后

皇統三年八月二十二日上欽仁皇后尊諡

敬事節用曰欽貴賢親親曰仁

命待制高士談撰冊文命都點檢元當仁告廟命太尉
費摩達奉上冊寶中書令韓企先進冊平章奕攝侍中
左丞宗憲右丞蕭仲恭攝門下中書侍郎大理卿馬諤
讀寶待制趙洞等四員舉冊并太常卿太常博士一二
月十一日乙卯孝孫嗣皇帝臣諱謹再拜稽首言曰臣
聞正位麗極肇造我家者必資淑聖然後成帝王之功
考謚定名昭示厥後者非薦徽尊無以見后妃之德繫

國朝之令典著今古之彞儀伏惟太母博厚配天貞明
齊日安順靜懿肅雍塞淵開王化以始基篤人倫而正
本慶流者遠挺生胄族之華善積在躬秀發閨齡之妙
言為圖史動合箴規鏘璜璫以和鳴容皆中節飾紘緼
而整治藝則生知粵自高門言歸烈祖時屬經綸之際
進膺窈窕之求禮未備於造舟志已躬於服澣義文六
子資生允賴於坤儀周亂十人同德莫先於文母體參
龍躍祥發燕禡贄榛栗以告虔羞蘋蘩而昭信必敬必

戒至靜至柔教以身而先人化自家而型國琴瑟在御
副祿以朝若為汭之嬪虞用全舜孝邁塗山之興夏實
佐禹功有開必先篤生皇考立予以適肆及眇躬承惟
輔佐之憂勞旣勤祖構宜享治安之逸樂遽棄母儀迄茲
纂承彌極攀慕弗獲逮事徒瞻服飾之山河未究推尊
有感烝嘗之霜露是以秉鈞元老蒞禮碩儒謀皆一辭
龜得吉卜請奉長秋之號追嚴厚夜之藏強為之名道
或存於擬議俄爾可測功豈盡於形容謹遣攝太尉皇

叔祖大司空昱奉玉冊寶上尊諡曰聖穆皇后伏惟皇
靈在天景福昌後衣冠原廟聿從高帝之游松栢閼宮
寅奉姜嫄之祀名昭不朽德播無疆嗚呼哀哉謹言二
月十一日乙卯孝孫嗣皇帝臣諱謹再拜稽首言曰臣
聞塗山儷禹史稱啓夏之功莘國配文詩播興周之美
洪惟令德愛掩前芳苟非著勤崇垂後之公何以申報
本飾終之孝若稽典冊允協神人恭惟皇后挺生名宗
來符興運稟是柔嘉之性形為貞靜之姿蚤以賢稱遂

為聖偶窈窕率禮藹闕睢淑女之風儆戒持心得雞鳴
賢妃之道我烈祖登大寶之始而太母正中宮之尊助
日宣光配天居體躬蘋蘩以奉宗祏服澣濯以訓宮廷
至於敬老尚賢矜孤閔乏嘗聞國論言必有稽間預兵
機謀無不中歷覽千古實惟一人志存社稷之深澤益
子孫之遠逮膺纘紹彌用追懷悵慈範之永違忱徽音
之如在致四海之養既弗及於承顏備萬物之儀固無
能於稱德尚書政府宗伯禮官僉謂移御舊宮升祔世

室宜刺六經之載用光百世之傳謹遣攝太尉皇叔祖
大司空昱奉玉冊玉寶上尊謚曰光懿皇后伏惟俯納
精誠昭膺懿號珠襦玉匣陪弓劍於軒臺風馬雲車從
衣冠於漢廟永綏純嘏幽贊丕圖嗚呼哀哉謹言八月
二十一日乙巳孝孫嗣皇帝臣諱謹再拜稽首言曰昔
我皇祖誕膺天命肇造區宇用垂統於後世至於太祖
聰明勇智克篤前烈迄用有成聲教暨於朔南仁恩被
於動植天監厥德用錫無疆之休雖簡在帝心本自神

聖而輔佐憂勤實與有力恭惟大行太皇太后坤靈毓粹圖魄儲精作合皇家儷體宸極儉以約已勤以率人陰教行於六宮素風表於千祀用能體資生之道助播物之功四海莫不蒙仁三靈於焉饗德雖塗山啓夏渭涘興周無以專其美也及先皇厭代哀戚過禮就養東朝德輝彌耀顧惟寡昧嗣守丕基方賴慈訓庶臻於理而昊穹弗愍大數俄及惘然追懷哀恫曷已今者卜筮告吉因山有期爰制近司請明舊典惟舉位以定名考

謚以尊德所以揚茂美而傳休聲由周而來率用是道
庶憑徽號以稱褒崇謹遣太尉行會寧牧鄭國王臣裴
滿達奉冊寶上尊謚曰欽仁皇后伏惟聖靈在天令名
不朽光配清廟永永無疆嗚呼哀哉謹言

惠昭皇后

天會十三年九月二日追冊惠昭皇后

徽宗景宣帝后

永寧宮

貞元三年十月二十一日上永寧宮謚曰慈憲

視民如子曰慈行善可紀曰憲

九月七日稟訖於殯殿親行禮外尚書省就便差官八日差侍講胡礪撰謚議學士施宜生撰謚冊文禮部侍

郎王競書篆冊寶

並給勅

十月某日命太師思忠充大禮

使右相師恭左相張浩攝侍中奉寶讀寶平章張暉蕭玉攝中書令奉冊讀冊左右丞叅政攝引寶門下侍郎引冊中書侍郎三品以上四員充舉寶舉冊官并差撰

寶盥官十二擗冊匣官十八太常博士五

引大禮使侍中中書令并引冊寶床

翰林使二讀祝太祝一舉祝冊奉禮郎二十八日遣使
丕承殿奏告百官陪位二十一日行禮前期有司供帳
於殯殿神御床案及設小次於殿下東廂又設冊寶幄
殿於東廊南空地內殿前司宣徽院約度差甲騎旗鼓
門仗官香輿自製造冊寶所迎奉冊寶奉安于殿

騎從儀同

是日未明有司鋪設香案供具等物於神位前設祝冊

案於神位之右又設拜褥三一在阼階上西面

殯殿別無阼階於殿東階上面西設拜褥

一在香案南面北一在殿上東欄子內面西質明有司
備常行儀仗皇帝自宮中便服乘馬百官後從大禮使
已下行事官等公服於殯殿門外迎立殯殿門外下馬
步入小次少頃御史臺催班大禮使行事官自幄殿奉
冊寶於殿西階下置定大禮使歸押班位閤門使奏班
齊皇帝更衣太常卿奏請行奉上冊寶之禮宣徽使太

常卿分左右導升阼階上詣褥位面西立宣徽使太常卿前侍宣徽使贊請再拜

凡拜者宣徽使贊請

閣門使臚傳在位官皆再拜贊請由殿上正門入於香案前褥位再拜上香又再拜退稍東於欄子內面西褥位立定儀司徹香案前拜褥設冊寶褥位於香案南舉冊擗冊官取冊匣於床對捧由西階升中書侍郎分左右前導奉冊中書令讀冊中書令並後從候褥位置定

欽定四庫全書

卷六

中書侍郎舉冊擯冊官稍退立奉冊中書令稍前於褥位再拜退就殿階上西南柱外面東立讀冊中書令稍前再拜擯冊官取匣蓋下置於西階下冊床上舉冊對捧冊讀冊中書令一拜跪搢笏讀讀訖就一拜起又再拜退立於奉冊中書令之次

凡讀冊寶祝文皇帝皆跪聽

奉冊中書令少進與中書侍郎率舉冊擯冊官奉冊匣由西階下引從如上儀復置於冊床置定舉寶擯寶官

以寶盃升至侍中讀畢由西階下復置於床皆如冊匣之儀有司徹冊寶褥位復設香案南拜褥宣徽使太常卿前導皇帝進就褥位再拜上香上茶上酒樂作三爵樂止太祝讀祝文訖再拜復歸阼階褥位立定大禮使升殿於香案南宣徽使處受福酒恭詣阼階褥位前宣徽使贊皇帝再拜飲福大禮使跪以酒盞進跪飲訖大禮使跪受酒盞宣徽使贊再拜閤門臚傳在位官皆再拜大禮使以酒盞復授宣徽使訖由西階下歸班位太

常卿宣徽使前導歸小次即座簾降太常卿跪奏禮畢
皇帝便服百官皆捲班西出大禮使以下奉冊寶床納
於殯殿左右相當處權行收頓有司轉仗由來路奉車
駕還內

大定二年四月九日改德宗為明肅永壽宮贈哀皇
后慈獻未改舊謚二十二年四月十一日明肅降遼
王正妃追封遼王妃李氏娘子徒單氏并庶人所生
母並封王夫人誥用漢字分付其孫元奴

欽慈貞懿皇后

大定元年十一月十五日追冊皇妣蒲察氏曰欽慈皇后皇妣李氏曰貞懿皇后

宣獻皇后

大定二年四月禮官檢引宋太常因革禮太平興國二年勅越國夫人符氏故夫人尹氏並追冊皇后令所司擇日備禮冊命禮院奏伏惟周廣順元年九月中追冊皇后柴氏顯德四年追冊皇后劉氏並不行冊禮建隆

三年追冊皇后賀氏亦不行冊禮詔依建隆三年故事
又宋會要建隆元年追冊帝母為皇太后仍令有司擇
日備禮後不行冊禮自後凡制書云冊命者皆未嘗行
冊禮兼昨者追冊睿宗皇帝欽慈貞懿皇后亦不曾行
冊禮今睿宗母及故皇后加上尊諡有無依典故體例
只降詔追冊尋擬奏合行頒詔從之睿宗母諡宣獻
聖善周聞曰宣聰明睿智曰獻

二十六日降詔曰恭惟祖妣作合太尊慶育睿考致三

靈眷祐邦祚以永而天祿集於眇躬尊祖之義禮宜報
本以朕心嚴父之孝推聖考念母之誠等而上之志非
敢後謹上尊諡曰宣獻皇后仍令有司擇日備禮冊命
主者施行布告中外體予至懷

昭德皇后

大定二年四月二十六日詔曰國家之體典故俱存正
位居尊必緣情而及伉儷懷昔追遠亦備禮以盡哀榮
爰舉愍章用慰窀穸下逮視寢悉使正名庶幾有知欽

承休命故妃烏林答氏可追謚為昭德皇后仍令有司
擇日備禮冊命故夫人僕散氏可追封元妃故夫人張
氏可追封宸妃主者施行布告中外咸使聞知

悼平皇后

原闕

大金集禮卷六

欽定四庫全書

大金集禮卷七

妃

冊太皇太妃 追封 雜錄

冊太皇太妃

天德二年正月二十五日尊冊太皇太妃命特進宗睦
特進宗厚充冊使副左丞宗儀攝侍中參政劉麟攝中
書令門下中書侍郎各二讀冊讀寶官各一舉冊舉寶

官各二以三品四品官攝充太常博士通事舍人有正
官外差內給事一禮直官一撰寶蓋官十二撰冊匣官
十八命直學士劉長言撰冊文禮部侍郎王競書篆冊
寶二十一日擬稟行禮儀式并冊寶等事准行外候二
太后禮畢於太和殿發冊冊簡用玉石為之條數合扣
冊文多寡用之其床匣亦隨冊之長短並紅漆金鍍銀
裝釘條網用紅絲帕用梅紅羅銷金以雲鳳為飾襯褥
亦用素紅羅表紅絹裏氈骨全寶以金為之龜紐

制度
小大

從宜製造

紐下鈹水地四面鈹雲鳳撿斗並用銀金鍍寶盃

并床並紅漆金鍍銀裝釘怕用梅紅羅表紅絹裏銷金

以雲鳳為飾襯褥亦用紅羅表紅絹裏瓊骨全

法物依前來製

度

其日質明應行事官帥弩手緞子門仗官於尚書省
引導冊寶進入內由蕭牆東門至勤政殿東廊下幄
次內權置禮直官引攝侍中中書令讀舉捍冊寶官
捍冊寶床弩手緞子等並在東廊下於冊寶幄次前

立以俟禮直官又引冊使副立於勤政殿門外東西
相向立以俟皇帝即座衛官文武百寮起居訖分東
西相向立禮直官通事舍人太常博士引冊使副入
訖冊寶褥位稍西當中北向典儀曰再拜贊者承傳
在位官皆再拜

典儀與贊者擬通事舍人充

侍中承旨降自東階詣冊使前東北西向稱有制典儀
曰再拜贊者承傳冊使已下應在位官皆再拜侍中宣

曰冊元妃為太皇太妃公等奉玉冊金寶展禮宣訖冊

使副再拜侍中退復位次引冊使詣受冊褥位立定又

引中書令詣冊使前東北西向立中書侍郎引冊案立

於中書令之右中書令跪取冊授冊使跪受訖興置於

案

舉案者退
立於後

冊使中書令中書侍郎俱退復本班次引

副使詣受寶褥位立定又引侍中詣副使前東北西向

立門下侍郎引寶案立於侍中之右侍中跪取寶以授

副使跪受訖興置於案

舉案者退
立於後

副使侍中門下侍郎

俱退復本班典儀曰再拜贊者承傳使副以下應在位
官皆再拜訖禮直官通事舍人太常博士引冊使押冊
副使押寶出引導如來儀宣徽使奏具官臣某言禮畢
降座百官出發冊訖冊使副應行事官分引冊寶至太
皇太妃本宮外幄次內權置訖冊南北寶南內給事先入報請
太皇太妃服褕翟服行禮甫近擬用常服就座禮直官通事舍人
太常博士引冊寶并使副及應行事官內給事俱入就
殿庭前西階下東向位冊寶少置冊南北寶南使副及行事官

立於其後少頃又引內給事進就南向立禮直官通事
舍人太常博士引冊使副就內給事前使副東向稱皇
帝遣冊使姓名副使姓名奉玉冊金寶上懿號曰太皇
太妃內給事先升詣座前躬言訖次禮直官通事舍人
太常博士引冊寶前行

冊寶匣盥蓋先去置於冊寶床上

使副并讀舉冊寶官從升內給事少進東向立擗冊官
當座前舉冊寶官單跪對舉讀冊官拜跪讀訖俛伏興

以冊授內給事掎寶官掎寶蓋升並如冊儀使副興行
事官並退內給事贊言禮畢

追封

天會十三年二月追冊德妃賢妃以韓企先為冊贈
使

皇統五年十二月二十九日以諸妃所封多同詳定到
元妃惠妃麗妃華妃唐制皆正一品擬用封先帝諸妃
仍以宮名別之如天輔年諸妃則曰慶元宮某妃天會

年諸妃則曰明德宮某妃景宣皇帝於典禮亦當立原
廟建宮名某妃號亦當冠以某妃其高下之序則以元
妃惠妃麗妃華妃貴妃淑妃德妃賢妃為次其冠以先
帝宮名者先慶元宮次明德宮勅旨准依

大定二年四月二十六日詔追謚昭德皇后并故夫人
僕散氏追封元妃故夫人張氏追封宸妃十一月十五
日宸妃改封惠妃十九年八月奉勅旨故磨撒氏追封
太皇太妃有司擬奏晉成帝貴人周氏生哀帝即位崇

欽定四庫全書

卷七

為皇太妃孝武母李氏孝武即位加為皇太妃二妃皆以子貴故稱太又唐皇后傳入廟稱后繫夫在朝稱太繫子與令闕蕭妃事體不同恐難稱太皇太妃兼

照到本朝太祖妃烏古論氏曰元妃太宗妃耶律氏曰崇妃合依已行故事追封妃號勅旨從之追封崇妃差官賫送誥命仍致祭候將來一就掩葬

雜錄


天德二年二月五日設太皇太妃尊從二十人傘子二

人九日稟訖盤鳳紫衫幘帶依弩手傘子例四月二十
九日太皇太妃每年錢二萬貫表二百段絹一千疋綿
五千兩妃每位歲給錢一萬貫表一百段絹三百疋綿
三千兩嬪已下五千貫表五十段絹二百疋綿二千兩
諸嬪妃共設導從四十人並幘頭紫衫衫上繡盤芭蕉
為飾

貞元儀式妃嬪導從共用二百二十人衣襖幘頭並
仍帶

大定二年七月五日擬奏正隆二年四月海陵庶人批
劄內職尚宮夫人以上及公主王妃郡縣主王夫人誥
命並用御寶相銜王妃王夫人亦入辭檢討到唐要吏
部告身印加告身兩字又太常因革禮皇后告身有司
進納於宮中見得妃嬪已下告身並合有司用印勅旨
依典故行二年十一月十五日勅旨內職四品以上給
宣誥五品以上只給告七年閏七月一日勅旨今後宮
中親王及妃嬪等宣誥並以漢兒字給授十一年八月

三日勅旨今後宮中妃嬪止以誥授不須用宣二十三年三月七日勅旨一品官職及宮中公主妃用玉寶九日稟奏緣內職公主王妃等並係誥授用吏部告印奉勅旨妃嬪已上及公主王妃並給宣誥其誥仍舊已下止給告



大金集禮卷七

欽定四庫全書

史部
大金集禮卷八

詳校官監察御史_臣劉芬

編修_臣程嘉謨覆勘

覆校官中書_臣汪學金

校對官中書_臣王鍾泰

謄錄貢生_臣周世燦

欽定四庫全書

大金集禮卷八

皇太子

皇統二年詔授儀

大德四年冊命儀

大定八年冊命儀

大定二十七年冊皇太孫儀

守國儀

雜錄

皇統二年詔授儀

皇統二年三月二十八日命皇子名曰濟安大赦天下

制曰禮重世嫡為其承七廟之尊國有元良所以係萬
邦之望顧惟菲德獲紹丕基勤以恤民居軫夙宵之念
約於奉已敢親聲色之娛豈惟中外之共知抑亦神明
之所鑒荷三靈之錫羨祐累聖之重光慶集中宮特生
上嗣宗社奉鬯已肇應於震方雷雨發春宜均敷於解
澤嘉與億兆同茲惟新可大赦天下云云於戲辰象著
明於赫前星之耀恩書寬大助宣沖氣之和更賴三事
大夫百司庶府共欽承於德意期式叙於民彝永沐淳

風翕臻壽域

三月十三日擬奏慶誕皇子合於踰月或三月剪鬚之後奏告天地社稷宗廟委司天臺選定剪鬚三月二十五日戊午巳時奏告用三月二十八日辛酉勅旨從之十七日命左丞勗奏告宗廟都點檢常勝奏告天地社稷就赴上京行禮并差待制高士談權太常卿提控祭告禮儀閤門三人管勾准備

十九日擬奏即日皇子誕生甫及月周臣等歷考古制

帝后在位降生元子者前代絕少又周成王幼在襁褓
即稱太子建置師傅今將及剪鬚當建名號若不奏陳
誠恐闕典勅旨依典故建為皇太子仍先告授尋委司
天臺選定剪鬚封建並用當日為吉從之省創用紅遍
地雲氣盤龍錦標金龍五色十八幅寶裝犀幅羅告一
通并真珠網紅錦袋告匣

十九日奏訖剪鬚儀無賜告一節二十一日奏訖封
建禮數添挿施行

其日質明百僚入殿庭東西相向立左右司郎官吏部
長貳郎官奉告身綵輿入置東階下

尚書侍郎於輿後面西立左右司郎官吏部官並歸
班

宣徽使太常卿引帝后出宮升坐庭下合班五拜舞蹈
又再拜歸分立位宰相執政官以上并行事官分東西
升殿侍立

中書令東階升殿上接官詹事由西階升與侍中對

立受告

以北為上諸保姆奉皇子自宮中出西房帝后降坐東南至阼階西向皇子近前東向帝后皆手撫之保姆等奉以再拜訖回轉立於皇后之次少却帝后外坐保姆奉皇子當坐前北面立吏部侍郎取告身於綵輿授吏部尚書

侍郎歸庭中面西位綵輿退置於東廊階下

尚書奉告升殿庭中書命

尚書降歸庭中班

中書令稍前側立

讀制畢卷之以授侍中侍中稍前接告面西側立

中書令歸

侍立

引奉皇子稍前受告太子詹事稍前面東與侍中

相對立奉皇子者皆跪侍中以告授詹事詹事跪受置

北

侍中歸立位

保母等奉皇太子再拜訖詹事持告從皇太

子入自東房還閣

詹事至閣前以告授掌管人退從殿側東北廊下門

出歸庭中位

皇后降坐當御座前再拜畢復升坐殿上臣僚皆降階

合班五拜稱賀

若有宣再拜聽勅又五拜如儀

畢帝后暫興入宮撫視

臣僚非特旨不敢入

及時剪髮留髻復出外坐庭下合班稱賀如前儀

或進稱賀禮物如式

合花坐臣僚上殿並如曲宴之儀惟以剪髻文代致語

慶賜取旨

剪鬚文

於赫吾皇丕承帝眷慶積德於椒房遂發祥於蘭殿少
海與福海同深前星與壽星並見上帝是依彌月不遲
溫文玉德岐嶷天姿騰懽心於綿宇擁嘉貺於皇基習
習兮風和遲遲兮日永得羨數於神策占瑞光於圭影
瀉香浪於龍湯垂寶螺於佛頂神祇祖考盡懽忻霑澤
均禧浹兆民玉葉金枝增福壽共扶聖祚億千春

剃頭人念文

聖主當陽中宮積慶元子誕生萬邦表正七花踊於金
塼九龍噴其香泉留髮之後壽福增延

二十六日冊曰禮典之垂訓鑒重世嫡所以丕叙人倫
帝王之御邦家建儲闡所以共承宗廟朕紹隆基緒祇
慎夙宵荷三靈眷顧之休開億載流光之福自中宮而
錫羨慶上嗣之應期歷修曠世之儀豈厭普天之意誕
敷庭號播告縉紳皇子濟安毓秀天潢分輝辰極寢興
占夢稔聞漢后之日符經緯儲精允協周家之聖瑞沈

厚積山川之氣溫文金玉之姿乃者元宰獻謀近臣
演議謂前代少陽之兆多育於朱藩而後宮甲觀之徵
不專於椒掖尚預崇於國本以外繫於人心豈如皇朝
盡軼隆古宜涓歲月之吉茂揚典冊之光上以答祖考
之歡下以副臣民之望言之甚切義不得辭肆因剪鬚
之辰俾正承華之位方當延老成為羽翼之輔建僚家
相朝夕之恭匪我一人之私惟爾萬方之慶於戲僉言
協卜既從蚤建之功幼歲親師庸助夙成之德宜非謀

非彝之勿用廣正言正事之嘗聞勉思求稱之難永錫
無疆之福

二十六日詔天下勅尚書省廣愛惟親愛厚人倫之化
立子貴嫡允為天下之公朕欽紹基圖祇勤夙夜屬燕
禔之肇慶自椒掖以儲祥誕揚典冊之儀式副臣民之
望皇嫡子濟安徇齊秀質岐嶷英姿載夙於初協漢后
日符之夢誕彌有赫同周家聖瑞之光屬宰輔之獻言
語春官而協議謂國本所當蚤建而宗鬯宜有共承稽

載籍傳德之格言有前代承平之故事禮之所急義不可辭乃因吉日之良俾正前星之位咨爾有衆其體朕心已降制命立為皇太子仍令有司擇日備禮冊命布告中外咸使聞知

五月十九日擬奏詳定所看詳前代故事立皇太子供賜之例極厚以重國體今來皇太子受告約量定到行禮併管勾事務等官各合給賜賞物及照到歷代以來曾有增秩恩例開列下項奉勅旨應據隨朝大小職官

并諸局分祗候人等並遷一資內有見帶金紫光祿大夫等吏部尚書充殿前都點檢長勝並與特進餘進封國公所據支賜賞物准奏

漢文帝立皇太子有降赦賜爵之恩光武立皇太子在朝官增秩各一等晉明帝立皇太子大赦增文武位二等後魏太武帝立皇太子王公已下並增爵秩宋文帝立皇太子賜文武位一等宋立皇太子常叅及見任官皆賜官一等

賜告太傅丞相宗弼銀絹二百疋兩讀告丞相韓企先
總領裁定禮數平章昂平章奕各一百五十疋兩其餘
奏告官撰詞定儀注奉告寫告監造告身以至進署祝
板令史等絹銀各有差剪鬚人遷兩資并賜錢銀絹人
口

天德四年冊命儀

天德^缺年正月九日詔立儲嗣合行典禮令有司條具

以聞

稟定候禮
畢遍行

稟定正月二十七日告天地宗廟二月二日受冊三日
謝宗廟命學士劉長言撰冊文直學士施宜生書冊篆
寶差侍御史許宏等三員監看成造冊寶并法物工部
郎中蒲輦等三員監看成造蓋匣床等命平章徒單恭
告天地平章蕭裕告宗廟并差引贊行禮太常博士通
事舍人太祝各一命左丞相思忠攝太尉克冊使右丞
相太臬攝司徒克副使平章蕭裕攝侍中奉寶讀寶叅
政蕭玉攝中書令奉冊讀冊太子太師太傅各一奉冊

寶吏禮部侍郎各一舉冊中書舍人二舉寶給事中二捧冊捧寶官各四左庶子二

一贊拜贊謝請內嚴外辦一次日代謝太廟

並宰執以次攝差并差左右率府典儀主節大樂令協

律郎各一贊者禮直官掌書

收冊收寶

各二通事十符寶郎

八昇寶蓋官十八匣冊十八

元申又有請中嚴外辦及承制侍中二員并中書下

侍郎禮儀使儀注內亦有

正月十日口稟下項儀禮除奏告就南郊臺行禮外並准行

五禮精義冊命大事先告天地宗廟示不敢專社稷地祇之屬不必皆告合省去此節止告天地宗廟今奏告天地雖有圓丘方丘未經行禮合依冊後已經遣使奏告之儀

前一日儀鑾司設座於武德殿南向設羣臣次於門外大樂令設宮懸於庭設協律郎舉麾位於樂懸西北東

向閤門設百官班於庭又設典儀位於班位之東北贊者二人在南少退俱西向設冊使副次於殿門之東又設冊使副受命位於百官班前又設冊寶幄次二於殿後東廂俱南向

前一日尚書工部奉冊寶并床匣進入

其日諸衛勒所部略列黃麾細仗於庭符寶郎奉八寶升置左右吏部侍郎奉冊匣禮部侍郎奉寶蓋於合立節處左右置於床訖出門外入百官班大樂令協律郎

樂工典儀贊者各入就位羣官等依時刻各服朝服侍
中版奏中嚴通事舍人引羣官入就位東西相向立以
北為上又引冊使副立於東偏門外西向門下侍郎引
主節奏節立於殿下東廊橫階道北讀冊中書令引冊
中書侍郎帥舉捧官奉冊床立於節南讀寶侍中引寶
門下侍郎帥舉捧官奉寶床立於冊床之南俱西向侍
中版奏外辦殿上索扇協律郎舉麾宮懸奏曲服朔盟
冠服出自東房

曲直華蓋警蹕皆如常儀

即座南向簾捲樂止通事舍人引冊使副入宮懸奏曲
使副就受命位樂止侍中中書令門下侍郎中書侍郎
舉捧官依舊西面立羣臣合班橫行北面立定典儀曰
再拜贊者承傳皆再拜班首起居又再拜閣門官引侍
中承制降詣使副東北面西稱有制使副稍前揖躬再
拜侍中宣曰命公等持節授皇太子冊寶宣訖又俱再
拜侍中還班門下侍郎引主節詣冊使所主節以節授

門下侍郎門下侍郎執節面西授太尉太尉受付主節
立於使副之左右中書侍郎引冊床門下侍郎引寶床
立於冊使東北面西以次授太尉太尉皆捧受冊床置
於北寶床置於南侍中中書令禮儀使舉捧官及拊床
者退於東西階道之左右相向立門下侍郎中書侍郎
還班位典儀贊曰再拜贊者承傳皆再拜羣官拜訖分
班歸東西相向位舉捧拊冊寶床者進引冊官引冊床
先行讀冊官次之引寶官引寶床次行讀寶官又次之

舉捧官各分左右通事舍人引冊使副隨之以行持節者前導使副初宮懸奏曲出門樂止侍中出班升奏侍中臣某言禮畢索扇簾降宮懸奏曲降座入自東房樂止通事舍人引羣官在位者以次出先是有司預設太尉司徒本品革車鹵簿於門外左右排列俟使副出門鼓吹振作

鹵簿依本品合得人數如無鹵簿鼓吹即以錦衣人代

禮儀使舉捧官執節者并擡拊人以冊寶少駐於東宮門太尉司徒及讀冊官暫歸幕次閤門官引入東宮俟至殿下位鼓吹止

有司宿供張東宮殿設太子座於辰前垂簾又設東西房於座之左右稍北又設受冊位於殿庭東階之南西向大樂令設宮懸於庭協律郎設舉麾位於殿上又設冊寶幄次及行事官幕次於門外左右其日儲衛於門外略設黃麾細仗於庭上設簾并扇左右各十紅傘一

稟定坐麒麟金浮圖

在東階欄干外又設舉冊寶案位於使副之前北向又設左庶子位於北廂南向質明執事官大樂令各就位東宮官屬俱朝服詣禁閤迎導從如儀主衣二人奉空頂幘絳紗袍

稟定空頂幘絳紗袍玉帶

以從至受冊殿後閤左庶子奏中嚴冊使副入門宮架奏曲俟冊使庭中立定樂止冊在北寶在南使副立於

床後禮儀使帥持節者立於前舉捧冊寶官立於冊寶
床左右讀冊寶官各立於其後左庶子奏外辦太子服
空頂幘絳紗袍左庶子引太師抱之出宮懸奏曲太子

降自東階

升降並左
庶子引

傘扇引從至階下望御座所在立

樂止冊使進立於右宣曰有制左庶子贊再拜太傅代
拜冊使宣曰制遣太尉姓名司徒姓名恭授皇太子冊
寶左庶子贊再拜太傅代拜冊使副少退俟升階樂作
冊使出就次冊使行鼓吹振作如來儀至殿門外止冊

使副入俯伏跪奏太尉臣姓名司徒姓名奉制授皇太子冊寶禮畢俛伏興退冊使少退時中書令侍中及舉捧官帥擡舁人奉冊寶以次進於太子前宮懸奏曲冊寶床自東階升並置於楹間冊床在北寶床在南中留讀冊寶官立位並去帕及蓋擡舁人執之退立於西朶殿前舉捧官分左右相向立讀冊寶官各立於床之東西向立既定樂止左庶子引太子自東階升宮懸奏曲傘扇止於簾外退於左右朶殿前

於座前南向立樂止中書令詣冊床南立北向稱中書
令姓名謹讀冊讀畢降自東階立欄外第一墀上西向
次侍中詣寶床南立北向稱侍中姓名讀寶讀畢降階
立於中書令之北西向左庶子引升座宮懸奏曲坐定
樂止舉捧官以次招擡舁人持帕蓋覆匣床奉置殿之
左右冊床在東寶床在西置訖舉捧官以次降階立於
中書令侍中之後立定合班北面左庶子贊再拜拜訖
降自東階出

冊寶等物並分付左庶子

受冊訖左庶子奏禮畢司贊引東宮官以次進就北向
位班首初行宮懸奏曲至位樂止贊者曰再拜班首已
下皆再拜贊者引班首自西階升樂作至階樂止進當
座前北向躬致辭稱賀訖降自西階樂作至位樂止贊
者曰再拜班首已下皆再拜左庶子前承令降自西階
詣東宮官前西北東向稱有令宮官等皆拜左庶子宣
曰祇奉聖恩授以冊寶榮幸之至兢厲增深所賀知贊

者曰再拜宮官皆再拜訖退左庶子跪奏稱禮畢降座
宮懸奏曲入東房樂止歸閤宮懸奏曲至閤樂止在位
者以次出通事舍人引太師抱詣帝后所御殿謝左庶
子贊再拜太傅代拜訖禮畢擇日親謝兩宮太后如謝
后儀同日遣左庶子詣太廟謝除祝版不用外並如奏
告之儀

宋會要該舊制皇太子冊用玉石簡六十枚今請增七
十五枚又太常因革禮皇太子玉冊五十枚冊匣隨冊

為之五禮精義該後齊用竹簡十二枚或以白玉為之
又該北齊簡制其詞多寡則出臨時已上隨代不同擬
依所撰冊文用見在已有冊簡隨文多寡用之五禮精
義該皇太子寶以黃金為之方一寸龜紐文曰皇太子
寶已上制度狹小看詳若比諸王印四邊各增一分用
金成造龜紐其文曰皇太子寶其綬並冊寶合用諸
物等擬依冊后已行制度成造其匣等並用朱漆以金
鍍銀粧

用黃麾細仗並同冊后儀

已稟訖用遣使儀十二日再稟定只用臨軒冊禮

前一日

云云
同前

出門外入百官班羣官等依時刻各服常

服其日東宮官應從者各服其服以序詣閤奉迎太子

出就次大樂令協律郎樂工典儀贊者各入就位侍中

版奏中嚴

云云
同前

太尉皆捧受門下侍郎中書侍郎禮儀

使舉捧冊寶官及舁牀者退立通事舍人引太子太師

抱之入就版位西北立主衣二人奉空頂幘絳紗袍以

從三師三少以次導從如式立於東南面西以北為上
初入門宮懸奏曲至位樂止通事舍人引太尉立於版
位之西面東司徒立於西南面北節在太尉東少南面
西冊寶床在司徒西南面東左庶子立於太子之右面
西司徒就床取冊進面東授太尉持節者俯跪節太尉
稱有制左庶子贊太子位右代拜冊使宣曰制遣太尉
姓名等授太子冊寶左庶子贊再拜太傅代拜冊使少
退引冊寶及讀冊寶并舉捧官帥擡舁人奉冊寶以次

進於太子前中書侍郎立於冊匣東北面南中書令詣
冊匣西北立南向舉匣官去匣蓋捧冊官捧中書令稱
姓名讀冊讀畢跪左庶子進詣讀冊官前跪受冊中書
令還位左庶子退授太子太傅代受以授掌書舉捧官
復蓋訖中書侍郎復引冊置於床少立門下侍郎立於
寶蓋東北面西南侍中詣寶蓋北立南面舉捧及讀寶
并受授引置於床並同上儀左庶子贊再拜太傅代拜
持節者加節衣贊皇太子退如來儀典儀曰再拜贊者

承傳在位者皆再拜羣官拜訖分班歸東西相向位舉
捧官昇冊寶者進冊床先行引冊官次之寶床次行引
寶官次之舉捧官各分左右通事舍人引冊使云云在
位者以次出同前

詣內殿及兩宮謝并謝太廟並同前

謝禮畢次日受賀於稟定合行禮位宰執王公已下并
宗室文武羣官及東宮師少已下官屬等俱服本品服
集於殿門外左庶子跪請內嚴少頃又跪言外備太子

常服出太師抱之左右侍衛如常儀即座南向禮直官

先引一品官入初至殿階太師抱立座前一品官升自

東階至殿上以序重行北向以東為上典儀曰再拜贊

者承傳在位者皆再拜答拜

太傅代拜

班首少前躬致賀詞

訖復位典儀曰再拜答拜

太傅代拜

禮直官引一品官降階

以次出太子即座禮直官又引文武二品已下羣官入

就庭皆以序橫行北向典儀曰再拜贊者承傳在位者

皆再拜躬身不答拜班首少前躬致賀詞訖復位典儀

曰再拜贊者承傳皆再拜如前躬身不答拜禮直官引

二品已下羣官以次出太子即座禮直官引東宮師少

官入初至殿階太師抱立座前師少升自東階至殿上

以次重行北向以東為上典儀曰再拜答拜

太傅代拜

班首

少前躬致賀詞訖復位典儀曰再拜答拜

太傅代拜

訖禮直

官引師少出太子即座禮直官引詹事已下宮官入就

庭皆以序橫行北向典儀曰再拜班首少前稱臣某等

躬致賀辭訖復位典儀曰再拜詹事已下皆再拜訖禮

直官引詹事已下宮官以次出左庶子跪言禮畢太師
抱還宮左右侍衛如常儀朔望受東宮官賀亦如上儀
二月五日以冊禮既畢詔諭天下

大定八年冊命儀

大定八年五月六日詔曰朕恭膺景命寅奉丕圖既承
九廟之尊深惟國本庶係四海之望用永皇基斯古昔
之宏規亦邦家之先務天興上嗣慶自中宮紹中國之
建儲稽禮經而立嫡肆遵彝典式示寰區皇子楚王某

資賦聰明才兼文武剛健而循理端厚而寡言從師友
則進學敏修道古今則經耳成誦造庭匪懈見孝敬於
問安養志無違表忠勤於視膳至於疏封大國益盡小
心操履謙和姿儀肅謹蓋神明之胄異稟而天地之祐
滋弘是以叶繼照於重離觀主鬯於游震上以纂祖宗
創業之緒下以慰臣民引領之誠其以某為皇太子仍
令有司擇日備禮冊命主者施行布告中外咸使聞知
五月七日呈省前代典禮既已降詔立為皇太子雖未

受冊禮其一切禮數與已受冊禮無異晉書云太子出
會在王公之上宋事實太子與宴在王公之上宋會要
太子與親王別班起居唐開元禮皇太子若來朝則皇
太子朝出訖引王公已下入通典鹵簿圖太子紫蓋今
來看詳如遇入朝與宴依前項典故合在王公之上常
朝日仍獨班起居候退方引親王以次班若與宴既在
王公之上自當禮絕百僚今擬於御座之左西向設位
比王公坐位少前其朝服紫袍玉帶玉雙魚袋傘用紫

羅表裏坐麒麟金浮圖交椅用金鍍銀栲栳圈靠背上
仍用雙戲麒麟

五月十四日依海陵庶人傘用梅紅羅表黃綾裏改
造

合用冠冕制度五月十一日勅旨委內藏庫官監造

七年十二月試得小短再造

御前五月十三日批劄護衛二十人

自來特旨差

掌寶二人

擁差內祇充保使

導引官十六人

差班祇人充保使

小底一十人

自來差官

員家子弟或
官籍監人克

過食小底二十人

自來尚食局
撥到係百姓

導從六十

二人

差中都
射糧軍

廚子二十人

自來尚食局
百姓或官籍監人
撥到係

馬小底

十人管事十人管鞍四人茶酒四人儀鑾四人下帳燈

火十人庫本把四人

并左右監門
每日輪差到

護駕軍十人牌子頭

一名

把門
守宿

十四日下吏部又下工部導從人數服色依

貞元儀式定到係常用六十二人

傘子二人
不在其數

並服梅紅

羅繡雙盤鳳襖子金花幘頭金鍍銀束帶應用引從物

鋤羅唾孟子水罐等並合用銀金鍍并奉勅旨月給五

百貫石外麴米麥春秋綾羅綿絹一例比附增添十五日奏定錢五百貫粟五百石麴八十秤黃米八十石小麥八十石春衣羅八十疋絹三百疋秋衣綾八十疋絹三百疋綿一千四百兩

七年八月五日擬奏昨奉勅旨冊皇太子事候奉安了日舉行今來有無準備於行從之十七日奏定用來年正月十七日謝廟行二十三日受冊及謝廟禮數合用鹵簿檢到開元開寶禮全數計二千二十人五禮新儀

二千三百七十三人有無依上項典故唯復裁減據其間制度與大駕同者擬依前來造皇太子金輅用龍鳳處改用麟鸞純用紅黃處改用梅紅又開寶禮皇太子升降輅合用輿輿制似輦而小今若比擬平頭輦減小成造見得別無窒礙所有文餘廳亦擬依金輅制度施行九月十七日勅旨鹵簿人數斟酌裁減餘准奏十二月五日擬奏依五禮新儀臨軒冊命時皇太子服遠游冠朱明衣詣太廟服袞冕并減定謁廟鹵簿人數用六

百人勅旨准外鹵簿用一千人七日擬奏宋會要該冊
皇太子列黃麾大仗於殿庭照到五禮新儀黃麾大仗
係五千二十五人緣來前上尊號時殿庭立仗用三千
人今擬依五禮新儀用黃麾半仗二千二百二十五人
外據仁政殿上表陳謝依五禮新儀文德殿用黃麾細
仗一千四百二人從之右冊命於大安殿為上親冊故
重其禮表謝於仁政殿為在下謝上不敢再勞聖駕御
大安殿並准奏

唐宋典故內皇太子冊寶制度該冊用玉石簡六十枚
寶以黃金為之龜紐文曰皇太子寶方二寸厚一寸行
用匣蓋等物合用黝漆黑色外有冊簡前後四枚刻龍填
金為捧護之狀依前來金輅制度改用麟十二月一日
勅旨捧護冊簡依典故用龍餘並准奏元申宋會要太常
因革禮皇太子冊玉石簡六十枚前後四枚刻龍填金
為捧護之狀貫以金煞首尾結為金花飾以帔鍔襯以
紅羅泥金夾帕藉以錦褥成以黝漆匣長九尺五寸濶

尺二寸高八寸覆以金夾帕絡以

闕

紅絲結條襯以

法錦褥安以黝漆金葉裝床其竿飾以螭首其黝漆匣用金塗縷銀花鳳葉裝加以腰輿行馬飾皆鳳條以魚釣竿為螭首又宋會要皇太子寶以黃金為之注云寶方二寸厚一寸繫以朱組大綾連玉環金斗金檢長五寸濶二寸厚二寸悉裹以紅錦加紅羅泥金帕納以小盃以金裝內設金床又盃二重皆幅以紅羅泥金帕盃及腰輿行馬皆銀裝金泥他法物皆銀為之鈹花塗以

金又案五禮精義云皇太子寶以黃金為之龜紐文曰皇太子寶又令云文皇太子寶為之不行用其封令書用春坊印今擬錦以龍鳳處改為麟鸞純用紅處改為梅紅他物並依上典故制度成造

九月二十九日差待制張等三員監看成造冊寶并法物禮部外郎趙揚等三員監看成造匣盂床等十二月一日命侍講張景仁撰冊文禮部侍郎劉仲淵書冊篆寶五日差工部侍郎張仲愈等二員提點編排儀仗并

謁廟鹵簿二十五日命右丞相良弼告天地樞密使志
寧告宗廟平章守道攝侍中奉寶右丞石琚攝中書令
奉冊讀冊引寶門下侍郎引冊中書侍郎各一行禮侍
中二押樂太常卿一正官外並三品官攝充并差捧冊
捧寶二大樂令典儀贊者協律郎引太子典贊儀各一
符寶郎四太博二通舍五詹少左右庶子左右諭德左
右率府僕正中允各一擗寶盃官八舁匣官十六

十二月二十三日擬奏下項儀禮准外冊命日皇太子

乘輿至翔龍門東宮官導從不乘馬

冊皇太子前三日合遣使同日奏告天地宗廟

奏告天地於自來拜天處宗廟在廟庭中通告用祝

文香酒等

冊前一日宣徽院帥儀鑾司設御座

在壇臺上

於大安殿當

中南向設皇太子次於門外之東西向又設文武百寮

應行事官東宮官等次於門外之東西廊又設冊寶幄

次於殿後東廂俱南向

冊東寶西

又設受冊位於殿庭橫階

之南

工部官與監造冊寶官公服自製造所導引冊寶床由宣華門入計會宣徽院進呈訖赴幄次安置

大樂令帥其屬展樂懸於庭

其日兵部帥其屬設黃麾仗於大安殿門之内外

其日質明文武百寮應行事官並朝服

朝服謂法服

入次東宮官各朝服自東宮乘馬導從至左翔龍門外

下馬入就次通事舍人分引百官入立班東西相向次引侍中中書令門下侍郎中書侍郎及捧昇冊寶官詣殿後幄次前立少頃奉冊寶出幄次由大安殿東降至庭中褥位權置訖

在受冊位近東稍北西向冊北寶南

奉引冊寶官立於其後皇太子服遠游冠朱明衣出次執圭三師三少已下導從立於門外侍中奏中嚴符寶郎奉八寶由東西偏門分入升置御座之左右侍中奏

外辦內侍承旨索扇扇合皇帝服通天冠絳紗袍以出
曲直華蓋侍衛如常儀鳴鞭訖宮懸樂作皇帝出自東
序即御座爐烟升扇開簾卷樂止典贊儀引皇太子入
門宮懸樂作至位樂止師少已下從入立於皇太子位
東南西向典儀贊皇太子再拜揖圭舞蹈又再拜奏聖
躬萬福又再拜訖引近東西向立師少已下并奉引冊
寶官等各赴百官東西班樂作至位樂止通事舍人引百
官俱橫行北向典儀贊再拜在位官皆再拜揖笏舞蹈

又再拜起居又再拜訖百官各還東西班師少已下并
行事官各還立位典贊儀引皇太子復受冊位樂作至
位樂止侍中承旨稱有制皇太子已下應在位官皆再

拜

行事官
不拜

躬身侍中宣制曰冊某王為皇太子俱又再

拜通事舍人太常博士引中書令詣讀冊位中書侍郎
引冊匣置於前捧冊官西向跪捧皇太子跪讀畢俯伏
興皇太子再拜中書令詣捧冊位捧冊授皇太子搢圭
跪受冊訖以授右庶子右庶子跪受訖俯伏興右庶子

以冊興置於床中書令已下退復本班次通事舍人太
常博士引侍中詣捧寶位門下侍郎引寶盃立於其右
侍中奉寶授皇太子搢圭跪受寶訖以授左庶子左庶
子跪受訖俯伏興左庶子以寶興置於床侍中已下退
復本班典儀贊再拜興贊儀引皇太子退初行樂作左
右庶子帥其屬舁冊寶床押以出

在皇太子前行

出門樂止侍中奏禮畢內侍承旨索扇扇合簾降鳴鞭

樂作皇帝降座入自西序還後閣侍衛如來儀扇開樂止侍中奏解嚴所司承旨放仗衛以次出皇太子入次改服公服還東宮導從如來儀

冊後二日兵部設黃麾仗於仁政殿門之內外陳設並如大安殿之儀

惟不設壇臺及八寶

百官服朝服皇太子公服至次改服遠游冠朱明衣通事舍人引百官入至階下立班東西相向典贊儀引皇

太子執圭出次立於門外侍中奏中嚴少頃又奏外辦
索扇鳴鞭並如大安殿儀

皇帝出自東序

通天冠絳紗袍或朔望冠服

即座簾卷通事舍人引百官俱橫行北向典儀贊拜在
位官皆再拜措笏舞蹈又再拜起居又再拜訖分班皇
太子捧表入

藝文類聚梁武冊太子表謝

至拜表位立俟閤門使將至單跪奉表閤門使接表訖俯伏興典儀贊拜措主舞蹈又再拜俟讀表訖侍中承旨退稱有制典儀贊再拜措主舞蹈又再拜訖典贊儀引皇太子退侍中奏禮畢扇合鳴鞭入西序還後閤侍衛如來儀侍中奏解嚴放仗百官以次出後二日百官奉表稱賀如常儀

其日質明東宮應從官各服朝服所司陳鹵簿金輅於左掖門外皇太子服遠游冠朱明衣升輿以出至金輅

所降輿升輅左庶子已下夾侍三師三少乘馬導從餘
官亦皆乘馬以從

東行由太廟西階轉至廟

不鳴鑼吹至廟西偏門外降輅步進由東偏門入幄次
改服袞冕出次執圭自南神東偏門入宮官并太常寺
官從於其後皇太子入詣殿庭東階之東西向立典儀
贊再拜訖升自西階詣始祖神位前北向再拜訖以次
詣逐室行禮並如上儀訖降自西階復西向位俟典儀

稱禮畢出東神北偏門謁別廟如上儀訖歸幄次改服
遠游冠朱明衣出次步至廟門外升輅過廟門鳴鐃而
行至右掖門外降輅升輿以入將士各還本所

後一日於東宮受羣官賀如元正受賀儀

冊曰維大定八年歲次戊子正月甲子朔十七日庚辰
皇帝若曰自昔有天下之君必嚴於宗廟惟時主宗廟
之器莫重乎元良朕丕荷燕謀中興桓撥惟休大厯用
卜於無疆永言孝思敢忘於嗣服蓋傳家而慮世及始

自夏商以來立嫡以正諸侯有若春秋之訓其承天序
匪出服私咨爾楚王某祥發中闈體鍾上嗣生而岐嶷
學則緝熙爛然揭前星之明溫其涵少海之潤文武之
藝卓爾良能仁孝之心克於固有職在於問安視膳未
嘗不承順其難古制有監國撫軍抑克堪負荷其任固
足以增重邦家之本允協億兆之心涓茲吉辰昭以備
物今冊爾皇太子於戲象取明兩位為國儲以恩則父
子之倫以義則君臣之分義不可或闕臣於君則必以

忠恩不可少忘子事父則莫如孝矧左右前後皆其正當尊所聞行所知惟出入起居罔不欽勿遊於佚淫於樂用光我祖宗之顯德以對茲典冊之闕休

大定二十七年冊皇太孫儀

大定二十七年十一月十七日制曰朕膺上天之眷命紹烈祖之慶基洪惟永圖早建元嗣上以承休於累祖下以繫望於多方嗟繼體之云亡賴貽謀之有託蓋天下大器可不正其本歟而世嫡皇孫所謂無以易者矧

其賢德之著宜貳宸極之尊肆舉彝章式孚有衆皇孫
開府儀同三司尚書右丞相原王綦祥開甲觀秀出天
支夙挺溫文日隆孝敬性姿超異自幼已若於成人學
問敏明所得必臻於至理昨晉封於王社稷作牧於神
州政成於旬月之間美審乎輿人之誦爰立作相歷試
諸艱益彰時序之能大副師言之錫顧垂統必資於善
繼而奉鬯不可以久虛是用正名茲惟合禮今立綦為皇
太孫所有合行典禮宜令有司條奏以聞布告中外咸

使聞知

太常寺檢討到晉書愍懷太子第二子臧永康元年立為皇太孫五月太孫之東宮車服侍從皆愍懷之舊又王隱晉書詔立臧為皇太孫文武官屬即轉為太孫官屬又晉起居注詔以太常成粲為太孫太傅又齊書永明十一年文惠太子夢立南郡王為皇太孫居東宮今來恭奉詔書命立皇太孫所有合行禮數即與前來命立皇太子時禮數無異及一切服用并所乘鞍轡等並

合一體施行今檢討叅擬定下項十一月十九日尚書省先具第二第三第四擬聞奏奉勅旨並依舊劄付禮部照會據所呈其餘事理除從人數目并歲支錢別行外並合一體施行雖未受冊其一切禮數與已受冊同晉書云太子出會在王公之上唐開元禮皇太子朝出引王公已下入前來已依此典故每入朝在王公上仍獨班起居候退方引親王以次班若與宴於御座之左西向設位比王公座位少前其朝服紫袍玉帶玉雙魚

袋

儀制

皇太子赴朝親王宰執許相見外其餘百官宗室並迴避

前來導從並服梅紅羅繡雙盤鳳襖子金花幘頭金鍍銀束帶鐏羅唾孟子水罐並用銀金鍍傘用梅紅羅表黃綾裏坐麒麟金浮圖校椅金鍍栲栳圈靠背上用雙戲麒麟

大定二年六月奏定依典故於宮城裏橫門外許用傘
並自來遇朝參至左嘉會門免傘下馬若遇雨雪用傘
近前至宣明門

制文

皇太子稱令旨內外百官及東宮三師對皇太子稱名
三少以下並稱臣及言奏仍俱稱殿下

自來本宮官依例言清躬萬福

前來參酌典故奏定皇太子逐日視事及見師少賓客服

小帽子皂衫玉束帶三師相見展阜三少並展紫并左右率府僕正副僕正典贊儀侍正侍承遇當直承應許服金帶

前來見師少官屬於承華殿并出入由承華正門已上擬間奏施行並依前來已行禮例乞開具

大定二年五月奉御前批剗定到護衛人從等奉勅旨月給錢粟麴麥春秋羅綾絹綿等其後歲給錢五萬貫已上擬取旨勅裁

皇太孫官屬名稱止合依前項晉典故施行

尚書省奏劄奉勅旨東宮諸局分承應人元設多少人
後來如何設到許多人寫了奏知尋送戶禮兵三部勘
到元設并在後添設到人數根因支破料錢等事及隨
局分見合設承應人擬到下項准奏外細車小底二十
人入殿小底六人不入殿八人過食十五人
護衛已奏定二十人
下項大定二年設置

導引

班祇人充係係使

元設一十六人今擬依舊導從

三貫元石

設六十二人大定十年三月添二十人

已下照勘得並係奏過或特添收

今擬六十二人細馬小底

四貫石

元設一十人大定三年

六年七年十年節次添至三十人今擬一十五人細車

小底

四貫石

元設一十人節次於大定三年四年七年十

年添至三十人今擬一十五人鞍轡小底

四貫石

元設四

人在後添設四人共八人今擬六人入殿小底

十貫石大定二

年五月收入殿當年九月收入殿

元設一十一人在後添

闕

人今擬八

人不入殿小底

石四貫

節次收三十四人今擬一十人過

食小底

石四貫

元設二十人在後添設五人今擬二十人

厨子

石四貫

元設二十人在後添設二十人今擬二十人

湯藥

石四貫

元設四人在後添設三人今擬四人下帳

石四貫

石

元設一十人節次於大定六年七年十年十二年十

七年添至三十一人今擬一十五人典設

石四貫

元設四

人大定七年添設二人今擬四人司藏本把

石四貫

元設

四人節次於大定三年十年添設二人今擬四人

下項大定二年已後設置

執旗二人

石四貫

大定七年收今擬依舊鷹坊子二十人

石四貫

大定十九年十二月添設二十人今擬一十人冠

帶小底四人

石四貫

大定三年四年節次添設今擬三人

剥鹿六人

石四貫

大定十年三月設今擬四人鋪陳一十

一人

石四貫

節次於大定七年十年十七年收到今擬六

人筆硯小底四人

石六貫

大定三年十五年節次收到今

擬二人書畫小底四人

石四貫

節次於大定三年十五年

收到今擬二人司藏知書二人

兩貫石

大定六年添差今

擬依舊司倉本把四人

四貫石

大定二年九月定十年三

月收到今擬依舊中侍二十一人

四貫石

大定十五年閏

九月收二十人十六年十一月收女直一名今擬一十

七人醫獸九人

四貫石

大定十七年五月見有醫獸四人

又奏添一名大定二十三年十一月又申兵部差四人

今擬四人馬羣子三十人

兩貫石

大定六年十七年二十

三年節次添差今擬一十五人牛羣子七人

兩貫石

今擬

五人駝羣子二人

兩貫石

今擬依舊

二十六年十二月七日奏稟司天臺選擇到冊命皇太孫吉日并太常寺檢擬到冊命皇太孫合行事理開具下項奉勅旨鹵簿依前來所擬用六百人餘並准奉行冊禮擬來年三月初九日辛亥臨軒冊命依前來禮到擬於大安殿行禮

前期三日合行遣使奏告天地宗廟

冊禮後二日皇太孫奉表稱謝擬依前來於仁政殿行

禮

皇太孫冠服制度擬依前來受冊日服遠游冠朱明衣
謝廟服袞冕合用金輅并輿照得舊有輿輅然前來曾
於宣考靈車前排設緣當日係是兼用吉儀今擬就用
皇太孫寶擬依前來以黃金為之方闕寸厚一寸龜紐
文曰皇太孫寶

皇太孫冊擬用玉石簡六十枚前後四枚刻龍為護捧
之狀前來刻龍處擬用麟奉勅旨依典故用龍

合用儀仗擬依前來大安殿冊命用黃麾半仗二千二百六十五人仁政殿稱謝用黃麾細仗一千四百二人皇太孫謝廟鹵簿前來擬用六百人奉勅旨用一千人皇太孫受冊禮日前來擬自東宮乘馬官官導從至翔龍門外奉勅旨令乘輿東宮官導從不乘馬

依前來合差撰冊文并書冊文篆寶官共二員今擬左諫議黃久約修撰黨懷英

二十七年二月九日奏稟太常寺檢照前來禮部擬定

到臨軒冊命皇太孫并謝上及謝廟等儀注開具下項從之

冊前一日宣徽院帥鑾儀司設御座

在壇臺上

於大安殿設

皇太孫次於大安殿門外之西廊又設冊寶幄次於殿後東廂俱南向

冊東寶西

又設皇太孫受冊位於殿庭橫階

之南

工部官與監造冊寶官公服自製造所導引冊寶床由宣華門入計會宣徽使進呈訖赴幄至次安置

大樂令帥其屬展樂懸於殿庭

其日兵部帥其屬設黃麾仗於大安殿門之內外

冊命日贊明文武百寮應行事官並朝服

朝服謂法服

入次皇太孫服遠游冠朱明衣升輿以出東宮官屬各朝服導從皇太孫至左翔龍門外降輿入就次通事舍人分引百官入詣殿庭立東西班相向次引侍中中書令門下侍郎中書侍郎及捧昇冊寶官詣殿後幄次前

立少頃奉冊寶出幄次由大安殿東降至殿庭褥位權置訖

在受冊位近東稍北西向冊北寶南

奉引冊寶官立於其後皇太孫出次執圭師少以下尊從立於殿門外侍郎奏中嚴符寶郎奉八寶由東西偏門分入升殿置於御座之左右侍郎奏外辦內侍承旨索扇扇合皇帝服通天冠絳紗袍以出曲直華蓋侍衛如常儀殿上鳴鞭訖宮懸樂作皇帝出自東序即御座

爐烟升扇開簾卷樂止典贊儀於皇太孫位東南西向
典儀曰再拜皇太孫再拜搢圭舞蹈又再拜奏聖躬萬
福又再拜訖引皇太孫近東向立樂作至位樂止師少
已下并奉引冊寶等官各赴百官東西班通事舍人引
百官俱橫行北向典儀贊拜在位官皆再拜搢笏舞蹈
再拜起居又再拜訖百官各還東西班師少已下并行
事官各還立位典贊儀引皇太孫復受冊位樂作至位
樂止侍中進前承旨稱有制皇太孫已下應在位官皆

再拜

行事官
不拜

躬身侍中宣制曰冊某王某為皇太孫皇

太孫已下又拜通事舍人太常博士引中書令詣讀冊
位中書侍郎引冊匣置於前捧冊官西向跪捧皇太孫
跪讀畢俯伏興皇太孫再拜中書令詣奉冊位奉冊授
皇太孫皇太孫搢圭跪受冊訖以授右庶子右庶子跪
受訖俯伏興右庶子以冊興置於床中書令以下退復
本班次通事舍人太常博士引侍中詣奉寶位門下侍
郎引寶盃立於其右侍中奉寶授皇太孫皇太孫搢圭

跪受寶訖以授左庶子左庶子跪受訖俯伏興左庶子以寶興置於床侍中以下退復本班典儀曰再拜皇太孫再拜訖典贊儀引皇太孫退初行樂作左右庶子帥其屬舁冊寶床匣以出

在皇太孫前行

皇太孫出殿門樂止侍中詣御座前奏禮畢內侍承旨索扇扇合簾降鳴鞭樂作皇帝降座入自西序還後閭侍衛如來儀扇開樂止侍中奏解嚴所司承旨放仗百

官仗衛以次出皇太孫還宮導從如來儀

冊命後二日兵部帥其屬設黃麾仗於仁政殿門之內
外殿上下陳設並如大安殿之儀

惟不設壇臺及八寶

百官朝服皇太孫公服至次改服遠游冠朱明衣通事
舍人引百官入至殿陛下立班東西相向典贊儀引皇
太孫出次執圭立於殿門外侍中奏中嚴少頃又奏外
辦索扇鳴鞭並如大安殿儀皇帝出自東序

金史卷八
卷八
冠服取旨

即御榻簾捲通事舍人引百官俱橫行北向典儀贊拜
在位官皆再拜搢笏舞蹈又再拜起居又再拜訖分班
皇太孫捧表入至拜表位立俟閤門使將至單跪捧表
閤門使接表訖俯伏興典儀曰拜皇太孫再拜搢圭舞
蹈又再拜俟讀表訖侍中進前承旨退稱有制典儀曰
再拜皇太孫再拜訖躬身侍中宣制訖典儀曰拜皇太
孫再拜搢圭舞蹈又再拜訖典贊儀引皇太孫退侍中

奏禮畢扇合鳴鞭皇帝降御榻入自西序還後閣侍衛
如來儀侍中奏解嚴所司承旨放仗百官仗衛以次出
後二日百官奉表稱賀如常儀

謝廟日質明東宮應從官各朝服所司陳鹵簿金輅於
左掖門外皇太孫服遠游冠朱明衣升輿以出至金輅
所降輿升輅左庶子以下夾侍師少乘馬導從餘官亦
皆乘馬以從

東行由太廟西階轉至廟

不鳴鑊吹至廟西偏門外降輅步進由東偏門入幄次
改服袞冕出次執圭自南神東偏門入宮官并太常寺
皆從於其後皇太孫入詣殿庭東階之東西向立典儀
贊曰再拜皇太孫再拜訖升自西階詣始祖室神位前
北向再拜訖次詣逐室行禮並如上儀訖降自西階復
西向位典儀稱禮畢還次服遠游冠朱明衣步至廟門
外升輅東去謁別廟並如太廟之儀訖歸幄次改服升
輅西過太廟門鳴鑊而行至左掖門外降輅升輿以入

將士各還本所

次日公服謁宣孝太子廟於東宮受羣官賀如元正受賀儀惟不用獻酒及作樂之禮

十五日謝廟十六日宣孝廟禮畢謁陵還受賀

二月二十三日奏稟合用奏告并行禮攝官員數奉勅旨東宮少師仰尚書省擬餘以點定官充尋再擬奏從之平章特進奏告天地平章金紫告宗廟左右丞攝侍中中書令禮刑部尚書攝門下中書侍郎左右宣徽攝行禮侍中工部尚書攝太孫太保簽書攝太孫少師

冊曰維年月日皇帝若曰昔我太祖肇造鴻業撫有於多方肆予一人纂紹丕圖期傳於萬世頃豫建於元子用祇率於大猷而享年不遐閱日寢遠仰賴上穹之祐蚤開甲觀之祥念儲副之重難乎久虛顧名分之嚴宜以時定載稽故事備有前聞謂尊嫡者議著於漢儒曰立孫者經明乎周禮先王彝典朕曷敢廢天下公義朕曷敢違咨爾皇孫某官某慶襲靈源系承正統英姿秀發德器少成動循謹厚之風居遠華腴之習諸艱歷試衆譽

翁歸初尹正於京畿旋登庸於揆路勤勞庶務兢畏一心
固足以貳宸極之尊協重離之吉式涓穀旦誕舉徽章粵
從朱邸之華嗣陟青宮之邃今冊命爾為皇太孫於戲國
本甚大也居之不可不敬廟堂至重也奉之不可不嚴篤
愛親之心在斯須不離乎孝盡事君之道唯造次毋忘於
忠爾能章不已之令名我亦有無疆之善慶豈不偉與其
勗之哉祇若朕命

謝表

端門宣詔方渙鴻恩宸扆臨軒載昭茂典祇膺寵數倍
積兢慚伏以豫建儲闈號稱國本仰以守宗祧之祀俯
以繫天下之心匪有元良疇諧師錫伏念臣年方沖弱
性本庸虛猥承世嫡之名優荷聖恩之庇始從羣爵改
胙國封特起自於服廬使習知於政務暫莅京畿之任
旋升端揆之司竊嘗省修已多忝越乃復嗣位承華之
重正名貳極之崇瑤牒寶章奉徽儀而增惕龍樓難載
撫孱質以奚勝茲蓋云云為宗社無疆之計惟古今大義之

公既惇貴貴之風仍厚親親之愛憶中宮於已往悼主
鬯之方虛念臣乃昭德之遺孫憐臣實宣孝之嫡子遂
曲垂於茲眷俾得冒於殊榮臣敢不恒自恪勤益深勗
勵惟師善事惟適正人學禮讀書慕聖賢之篤行問安
視膳率忠孝之良規

賀表

璿宮敷佑夙開甲觀之祥寶冊正名爰定春宮之位載
舉升儲之典式昭繼體之光肆嚴奉於宗祧保永安於

社稷是謂立國家之本有以格神祇之歡少海分流接瀛波而增潤前星續耀拱帝座以常明和氣周被於九區厚福延及於羣品臣等欣逢聖運幸覩曠儀基緒有輝仰重離之叶吉戡穀來備慶萬壽之無疆

守國儀

車駕將幸上京擬定東宮治事儀式大定二十三年十月二十一日准奏皇太子三日一次於承華殿受尚書省啟事續奉聖旨只於集賢殿視政

皇太子見宰執師少並用已定儀禮

啟事日服帽帶正座宰執展紫分東西向坐左右司啟
事亦並展紫

二十四年三月勅旨教都事啟事議除授不妨事

隨朝并在都官遇朔望日具公服問候其禮依已定相
見儀式皇太子是日仍具袍笏

啟稟過事務並稱啟稟奏訖奉令旨依

遇治事日本宮官屬侍立如常儀

二十四年三月十九日奉勅旨造監國印今擬比親王印稍大半分以金為之龜紐篆文曰監國之寶准奏改監為守比親王印大一分并擬其日遣使詣東宮皇太子具公服詣褥位立使者稱有勅兩拜使者傳宣朕將巡幸上京令卿權守國事仍付卿守國之寶想宜知悉

訖授皇太子寶又兩拜禮畢

奏奉勅旨御前祇受

雜錄云三月七日皇太子御前受寶訖實錄三月七日授之

三月五日擬奏下項儀禮奉勅旨遇有詔書皇太子止俟於應天門外萬春節賜宴於集賢殿仍用落後教坊樂起居表沿路二十日一次差走馬人進呈到上京已後一月一次仍附帶尚書省表章餘並准奏

詔書迎接儀

使者於前一程頗先遣人報尚書省及詹事院有司於

應天門外望闕設香案一并設皇太子親王宰執以下
褥位於香案前又設使者褥位於香案之左又設讀詔
案於香案之右皇太子親王宰執以下百官詣五里以
來迎接仍委留守司備旗幟音樂綵輿香輿等使者將
至皇太子立於香輿前褥位親王宰執并百官序班立
定使者去綵輿百步間下馬取詔置綵輿中皇太子詣
香案前上香訖詔輿行使者上馬後從皇太子親王宰
執以下並上馬後從至應天門外使者下馬就褥位立

皇太子親王宰執已下序班立定使者於輿內取詔置於案綵輿退使者稱有勅皆再拜皇太子少前上香訖復位又皆再拜使者取授尚書省都事都事跪受及尚書省令史二人齊捧同升於案在位官皆跪聽讀訖置於闕都事已下退皇太子親王宰執以下俱再拜搢笏舞蹈俛伏興再拜皇太子少離位望闕跪問聖躬萬福在位者皆跪使者躬身答曰聖躬萬福禮畢皇太子還宮宰執同使者詣尚書省館待禮畢使者還館使者行

親王宰執同百官送至都城門外班首酌酒一卮酬酢訖親王宰執已下相揖別使者上馬乃退

萬春節若有天使賜宴儀

使者到館有司陳設宴所并香案褥位其日與宴官並公服先詣庭中望闕褥位班定典儀引皇太子詣褥位使者立於香案之側皇太子以下皆再拜上香復位再拜跪使者宣傳訖又再拜搢笏舞蹈俛伏興又再拜皇太子少離位問聖躬萬福在位者皆跪使者躬身答曰

聖躬萬福典儀引升階就坐親王宰執以下依班次見訖分東西升階就位少立使者欄子內見訖皇太子各就坐使者隅坐前筵畢少頃戴花再詣望闕褥位再拜執事以表跪進皇太子跪授使者

在位者皆跪

使者跪受訖

各升階就坐禮畢退

二十五年二月擬定若於集賢殿賜宴天使敷德偏門內下馬

賜生日或年節儀

使者到館先報詹事院東宮門外設使者幕次又於承
華殿前望闕設香案禮物案并褥位皇太子公服乘馬
出迎與使者同入左掖門至東宮門外皇太子先詣香
案側褥位使者就次以賜物授執事者二人對捧先行
使者從入立於褥位置案上執事者退典儀引皇太子
詣望闕褥位再拜上香復位再拜跪使者傳旨受物訖
再拜搢笏舞蹈俛伏興又再拜離位跪問聖躬萬福使
者答聖躬萬福復位執事者以表跪進皇太子搢笏跪

授使者使者跪受訖典儀引升殿東西向坐

皇太子在東使者在西

酌酒一卮立勸使者立飲訖以禮物授使者退

皇太子問聖躬起居表幾日差走馬人進呈尚書省表
有無附去

重五九月九日合與不合拜天射柳仍於甚處勅旨拜
天射柳城外

擊毬於甚處勅旨於常武毬場樂亭上坐

圍獵事如何勅旨從來往日數亦從太子所欲

賜書迎接儀

行宮禮部二十四年五月奏過皇太子公服乘馬出左掖門外下馬使者捧書置綠輿中皇太子詣香輿上香導從前引香輿在前綠輿次之皇太子乘馬從行使者亦從行至承華殿門皇太子下馬從香輿入至殿前使者取書置案上皇太子再上香使者以書授皇太子跪受訖再行躬閱畢以授詹事跪問聖躬萬福使者答聖

躬萬福禮畢

奏定合間奏事理五品已上并隨駕大小官除授

勅旨五品已上除授在此擬定

間奏應邊關頭段事理五品已上文武官循遷隨駕五品已上官假故犯贓罪罷職解由到部官承襲千戶謀克軍功五品已上遷叙每歲天下院務比較增虧每歲民間有無非理差科應橫支每歲五享二社差攝官及祝版并隨節國忌遣使祭奠山陵祝版五嶽祝版

勅旨差攝官在此擬定奏五嶽只降香

每歲頒歷詔御試點讀卷官雜犯死罪

勅旨原情可恕及合上情勅裁者奏

五品已上官犯應決罪應據宰執情見不同難以與決
事理應三國人使並去上京行禮若有諛載不盡事理
並類施行

在此施行事理宮中並省臺寺監外六品已下除隨季
部擬正八品已上除六品已下循遷宮中諸局分承應

人等出職已經奏五品已上官假故宮中在此局分人
告侍親品官子孫承蔭非引見者軍員使効係班并宋
齊官換叙蕃部承襲年老放罷千戶謀克係班六品已
下致仕非宮中者賑濟賑貸

聖旨
聞奏

隨路灾傷府會試差

試官六品已下官追解察到不好官告移推并杖已下
罪獲賊補官并獲姦細補官

東宮視政宰執生具若亦用繡墩恐與朝殿筵宴無別
擬止用杌子宰相在上執政次之更合準備紫羅鋪坐

紫羅杙衣又案法朱油素梅紅羅案衣素梅紅羅蒙帕
椅法朱油金鍍銀獸獸口用梅紅絨條結椅背梅紅羅
明金團花獸搭手同踏脚與椅同用素梅紅羅蒙帕

三月十七日並准呈差知寶二人擡案四人及檢照唐
令有典謁名稱差禮直官六人權行勾當

雜錄

天會十四年月日命皇孫為諳版勃極烈制曰太祖之
世嫡皇孫故命爾為諳版勃極烈其無自謂幼冲狎於

童戲惟敬修厥德

天德四年九月十五日檢討到唐孝敬皇帝為太子時
改弘教門為崇教門沛王為皇太子改宗賢門為崇文
館皆避名諱以遵典禮緣係單名又禮記曲禮篇云二
名不偏諱注云孔子之母名徵在言在不稱徵言徵不
稱在又唐高祖採濟世安民之義以名太宗武德九年
立為太子下令曰依禮二名義不偏諱其官號人名與
公私文籍有世及民兩字不連讀者並不須避稟訖光

字不須迴避光字在上連稱者亦得

大定二年七月一日擬奏唐會要公卿大夫與太子同名無嫌蓋尊統於上故事東宮官與太子名同皆改并宗姓中有名同者迴避其餘不在迴避之限從之

九年九月二十三日檢討到唐會要順宗立廣陵王為皇太子尚書王紹本與太子同諱陳請改名時君子非之謂東宮之臣當請改耳又唐孝敬皇帝為太子改東宮弘教門其弘字係當時太子正名所以令本宮改避

無迴避疑混聲字典故又唐武德九年太宗為太子避
連用世民字係自下令避其名難以遵用昨大定二年
已具典故聞奏見令下一字同音者東宮官依上迴避
奏奉勅旨准外皇太子名下一字如百官名同者改避
其同音字不在迴避之限

大定二年十一月七日叅照通典開元禮五禮新儀唐
六典擬到元正誕日勅旨准奏外親王於欄子內一品
宗室於欄子外其餘宗室並庭下拜皇太子起居答揖

後准皇太子奏答拜

其日質明羣官並公服集於門外少詹事奏請內嚴又奏外備典儀引升座文武宮臣入就庭下位重行北向立定典儀曰再拜在位官皆再拜為首者少前跪奏元正首祚生日云慶誕令辰伏惟皇太子殿下福壽千秋賀訖復位典儀曰再拜宮臣皆再拜坐受拜訖分東西序立次引東宮三師於殿上三少於殿柱外北向東上立定皇太子詣南向褥位典儀曰再拜師少皆再拜為首

者少前稱賀

同前

復位執事者酌酒一卮為首者奉進樂

作飲訖樂止回勸師少訖各復位典儀贊師少再拜答拜

以尊師重傳有答拜之禮

師少以次出皇太子就座次引親王於欄子內一品宗室於欄子外其餘宗室並庭下序班拜致賀辭并進酒如上儀皇太子答拜訖就座次引隨朝三師三公宰執於殿上三品已上職事官露階上四品以下就庭下並

北向每等重行以東為上立定皇太子詣褥位典儀曰
再拜上下皆再拜為班首者少前稱賀訖復位執事者
酌酒一卮為首者奉進樂作飲訖樂止

如有進獻禮物如常儀餘同

回勸三師三公其餘殿上羣官並令執事者以盤行酒
飲訖典儀曰再拜上下皆再拜答拜

以尊君上答拜

引羣官以次出少詹跪奏禮畢

按通典唐禮皇太子元正受賀公初入門左庶子奏殿
下為公王與皇太子降立於座後若有王公諸伯叔則
降立於東階下西面公至階則升於座後與羣官同四
拜皇太子答再拜又太常因革禮皇太子受冊畢諸王
宗室北向序班於庭下皇太子坐受

諸王謂宗室封王者古重宗子宗室皆當尊之凡行
典禮尤當嚴正名分以厲其餘

又通典冊禮畢羣臣如元會之儀今擬親王宗室賀皇

太子依冊畢受賀禮又緣唐元正禮見諸伯叔則降立於東階下及與羣官同拜皇太子答拜有此不同并典故別無妃主命婦見太子禮照到令文應致恭之官相見或貴賤殊隔或有長幼親戚者任隨私禮今來若在東宮候皇太子便服合依私禮接見又三師已下遇皇太子旦日在御前即候皇太子先進酒訖百官望皇帝再拜班首跪進酒又再拜若賜酒即當殿跪飲訖又再拜

皇太子奏狀受百官慶賀禮內文一款親王并一品宗室皆北面拜伏臣但答拜而已雖於典禮以尊宗子其在長幼惇叙之間誠所未安當時遽蒙頒降未獲懇讓今來元正之明日有司舉行前禮伏望聖慈許臣答拜庶敦親親友愛之義二年十二月二十九日奉勅旨依仍令尚書頒下所司

皇太子生日公服左上露臺欄子外先兩拜二閤使齊揖入欄子內拜跪祝訖拜起復位兩拜又兩拜接擡進

酒進訖退跪候飲訖接盞復位轉擡訖兩拜宣徽將酒
進皇帝親賜酒接盞稍退跪飲訖宣徽接盞復位兩拜
揖入欄子內跪措筯受賜物訖出筯起復位兩拜退更衣
入殿稍東西向立定次皇妃等做生日勸酒皇太子跪
皇妃等亦跪接盞飲訖各兩拜

次臣寮進
酒見前儀

大定二年十一月九日擬到百官并宮官相見儀勅旨
准奏并奉表體式及用印例准呈

三師三公欄子內北向立躬揖為首者稍前問候

下同皇

太子離位稍前正南立答揖二品

並謂職事官

欄子外稍近

南躬揖

親王同

皇太子起揖三品露階上又近南躬揖皇

太子坐揖四品已下庭下躬揖跪問候皇太子坐受

今大定儀制云三師三公親王宰相樞密使欄子內

北向云云執樞密副使御史大夫及一品執事官云

云注並與親王同五字削去太子太師太傅太保與

隨朝三師同少師少傅少保與隨朝二品同詹事以

下並庭下西北每品重行以東為上再拜班首稍前

削前
問候
又再拜皇太子坐受

唐志太子通表如諸臣之禮除無節辰奉表典故若遇合奉表擬依令文格式臣誠懼誠忤

賀則云云誠懼誠忤後章未准此

頓首頓首入詞云云謹奉表稱謝以聞

稱賀陳讓陳乞倣此

臣誠惶誠懼頓首頓首謹言年月日皇太子臣名上表若封令書用宮師印別無上表用印典故擬依即令奏

目例更不用印

檢到通典開元禮皇太子衣冠制度內該烏紗帽視事及燕見賓客服之今擬皇太子逐日視事及見師少賓客服小帽阜衫玉束帶三師見皇太子不稱臣

通典漢魏故事太子於二傅執弟子禮少傅稱臣太傅不稱臣

擬展阜三少見皇太子稱臣擬並展紫三年九月一日勅旨准奏

皇太子出入別無接送禮例八年十月十七日奏奉勅
旨園場出入不須預別委勾當多時即令接送園場出
入所過州縣官只於側近接送不得出境遠去九年五
月皇太子坐夏擬定於都外三里以來量地之宜鋪設
褥位三公宰執以下公服重行立定皇太子便服三公
宰執以下躬身班首致辭再拜皇太子答拜訖退迎接
亦如之十八日准呈又六月五日奏奉勅旨具牋問候
緣百官別無拜禮恐只合尚書省首相具御位姓名等

修寫如儀於都堂以牋授走馬人更不合集會百官外
司徒合另具牋問九日准呈

宰執除外任辭見止合依已奏定依品從見皇太子儀
七年十二月二日准呈

皇太子赴朝除宰執親王許相見外其餘百官宗室並
迴避

即今大定儀制云云除親王宰執樞密使副御史大
夫判宗東宮三師許相見外云云

東宮官見皇太子依例言清躬萬福別無違碍大定二年五月二十三日准呈

職林太子舍人秦官掌宣傳令旨今擬稱令旨二年六月十五日准奏

四年七月二十五日奏歷代太子親政事典故勅旨送皇太子并奉勅旨今後奏過事件約度將赴太子處經歷五年六月檢討到宋會要談真宗天禧四年內出御札今後中書樞密院及諸處合談進呈取旨公事並依

舊進呈外所有常程小可事務委皇太子與宰臣樞密使已下就資善堂商量發遣訖奏又定五條內第三條該一後殿及軍頭司公事亦仰逐司具名件赴資善堂通呈今擬於東宮作通呈施行七月一日再擬定只用呈字

七年十月二十五日勅旨東宮涼樓前添殿仍蓋貯廊參政孟浩諫皇太子雖為儲副終是人臣若所居與至尊宮室相伴恐於制度未便兼東宮燕寢及游歷處所

已是完備且皇太子年幼性未純成宜示儉德奉勅旨所奏甚當據東宮添蓋事仰行停罷

宋會要南郊正陽門習儀皇太子立樓上御座之西左右持繖障日太子不許見得宋時許將繖入宮今擬於宮城裏橫門外許用繖二年六月一日准奏

又叅酌定到皇太子每朝見依前至左嘉會門外免傘下馬若遇雨雪恐失禮容更用傘近前至宣明門九年七月四日准呈

人使朝賀殿庭筵宴自來臣僚襖坐用紫羅繡盤鳳棹
衣係是紫羅團搭南花今擬皇太子襖坐用梅紅羅繡
間金盤鳳外棹衣亦用梅紅羅繡獨角間金盤獸二年
五月二十二日准呈

四年十一月三日奉勅旨皇太子四妃除正妃合作妃
名稱外檢討古來典禮是何名稱檢到唐六典太子內
官門漢書曰太子有妃有良娣有孺子凡三等歷代用
之宋明帝時太子內制職二等有寶林良娣南齊太子

置三內職良娣比閭內侯寶林比五等侯才人比駙馬都尉隋唐并宋天聖令太子內官除妃外有良娣二人

三正良媛六人正承徽十人正昭訓十六人正奉儀二十

四人正七日奏奉勅旨良娣良媛入五品承徽昭訓奉

儀入六品仍為定制其日出給皇太子妃元掖宣麻良媛昭


訓奉儀并許王妃誥命

大定二十六年十二月二十三日奏稟將來正旦聖節皇太孫除合稱賀外緣在服制不合預宴并本宮元日

亦不合受賀從之

二十七年二月九日奏稟禮部勘當到將來皇太孫受冊後於本宮受羣官賀如元正賀儀檢討到開元禮皇太子元正受賀儀公初入門左庶子奏為公王興若有諸伯叔則降立於東階下西面公王至階則升於座後今來叅酌比依上項典故親王入門將至東副階皇太孫降至東副階上親王既升則還立於座前親王攔子內再拜致賀詞訖又拜皇太孫俱答拜

二十六年二月二十五日奏稟三月九日冊皇太孫行禮契勘到大安殿前綵山若於三月初五日人使辭朝罷依例拆去緣相去行禮日數至近誠恐難迭奉勅旨初三日宴罷行拆去



大金集禮卷八